

度

支

奏

議

廣支奏議目錄

四川司五卷

覆南京屯政條議清釐疏

覆南臺謝秉謙軫卹江北災民疏

覆江北撫按題議禦外安內疏

覆南京倉院條陳南糧諸弊疏

覆白糧量改限期隨漕徑進疏

題立法督催起解拖欠布疋疏

覆江北撫按備陳捕獲解散饑民疏

覆御史劉興秀條陳江南六款疏

覆良鄉縣解官賠銀疏

覆鹽城興化等州縣水災賑卹疏

覆泗民被溺安集蠲卹疏

覆四川七年元年拖欠本地錢糧疏

再覆江北州縣水災賑卹蠲折疏

度支奏議卷之五

太子太保戶部尚書焦漣青畢自嚴視草

覆南京屯政條議清釐疏

題爲酌議屯弁勸懲清完之法事四川清吏司案
呈崇禎四年十二月初六日奉本部送戶科抄
出總督糧儲南京戶部右侍郎呂維祺題前事
等因崇禎四年十二月初四日奉

聖旨該部確議具覆本內末款一面先行革去官職
嚴行提問是否典制併看議來說欽此欽遵議覆

間本年十二月十一日續奉本部送戶科抄
巡按直隸監察御史任傑題爲遵

旨條奏事崇禎四年十二月初九日奉

聖旨該部一併議覆欽此欽遵通抄到部送司奉此
查得南京總督糧儲條奏屯政利弊凡八款南
屯田御史條奏凡十二款內如恤屯官慎選委
清比較嚴叅處結查叅禁需索倣怠玩禁告災
八項大槩與總督條議相同蓋總督屯差事屬
同舟故議皆彷彿況奉有該部一併議覆之

旨合無將總督屯差相同八款及屯差所餘懲豪右
訪積惡嚴操練清屯運四款一併酌議具覆案
呈到部該臣等看得屯糧關係軍

國屯政亟須修明乃 留都管屯谷弁邇年法紀

玩弛積欠相仍自督臣呂維祺與屯臣任傑多方
催徵查比已覺風逋稍清漸次改觀矣惟是
沉痾已深非從新振刷一番終難破其頑縱之
習此督臣屯臣所以旣摘叅屯弁不法之尤復
條議勸懲清釐之法或以八款或以十二款相繼陳

請總之澄源剔蠹起弊維新均裕

國之深心而飭玩之良法也既經南京總督與也

田御史徐議前來相應列款覆議上 請恭候

命下臣部移咨南京總督糧儲并南京都察院轉行

南屯田御史各行所屬一體遵奉施行

計開

一曰嚴比較

前件臣等看得屯糧必以當年完解有逋欠者加以比較此舊例也積延已甚不得

不繼以筮楚套玩已久未免又視爲故
事今督臣屯臣議欲總核立簿親註查
比仍取年貌互結以防代分別提究監
追以肅法委難曲貸至革冠帶與革職
則應照舊例未完分數具題請

旨從重褫革所爲俾情法適均而衛弁輸服者此也
其鳳陽倉屯官頑通特甚而督臣屯臣
又以隔遠不能親比合應責成留守分
司等官加意比追仍摘叅頑梗之尤以

聖裁

做其餘各該分司每季開報完欠毋容捏數將屯并知憚而儲精自裕矣伏候

一曰寬文法

前件臣等看得

留都衙門甚衆卯揖比較甚繁輪班直月等項殆無虛日則屯官方以奔命爲事安能專心力於屯務也今督臣等議自後屯官止聽督臣與屯臣比較其總巡各司應

天廳官新舊套比卯揖請假虛文及雜差別用悉行除免庶官無影射力可專徵不得借妨屯爲口實矣寬虛文政以嚴實効也伏候

聖裁

一曰慎選調

前件臣等看得

留都衛弁祇知管屯營利罔識催徵盡職甚且貪委卸擔交代扶同則以官爲傳舍安望

屯務之修理也今督臣等議凡遇軍政
考察等項務咨同兵部或選或調商確
更定毋許貪弁跳越他所營求他委俟
屯糧全完咨明方准各衙門別用至經
叅送屯官尤不許別行差敘如踵前弊
提究不貸斯倖竇塞而職業專矣伏俟

聖裁

一曰酌恤荒

前件臣等看得災宜實告

恩豈倖徼乃屯官旗棍每每侵欺攬費專候告荒圖
免徒飽奸貪奚禪

國計今督臣等議照南糧不赦例卽遇

恩詔聽督臣會同屯田御史查果軍貧逋少量題蠲
免非遇大荒不許輒議蠲折卽屯軍苦
本色而樂折色亦須部院覈查明確每
石約以七錢上下折納若官旗指災紛
告搖惑衆心者必罪不宥庶觀望絕而
積逋清矣伏候

聖裁

一曰禁需索

前件臣等奏得法嚴料索倉庫留難無奈
積習相沿人心易玩故屯官索旗甲旗
甲索屯軍而倉攢軍斗班皂歇脚等役
則又以官旗爲奇貨內外盤踞指勒需
索無所不至今督臣等議欲嚴飭江北
鳳陽二分司釐剔前弊如查訪告發得
實必盡法究處仍追贓克餉蓋私竇旣

塞則正額自克耳伏候

聖裁

一日速查追

前件臣等看得屯田之法首嚴侵占亦禁阻撓夫屯官卽不乏侵漁者乎間有監生生員閒弁勢豪黠旗悍卒之輩通屯糧而不完因追比而開告部院不得不批行查審屯官不得不赴彼聽理有等昏庸問官縱容吏書沉閣占悞結局無

日則屯官藉爲口實而屯糧幾不可聞
矣今督臣等議欲重加申飭嗣後凡經
批發屯官事件毋論虛實俱要刻期報
結有州縣與衛官仍前抗肆長奸者有
司叅處衛官革印仍各將經承吏書提
究庶胥屯官免掣肘之累矣伏候

聖裁

一曰信舉刻

前件臣等看得舉以示勸劾以示懲此激

勵屯官大典卽歲歲舉行猶患猾黠頑
鈍之輩恬不知畏乃

留都置而不行亦何恠乎奸弁之愈肆無忌也今
督臣等議請照例每歲舉劾所當申飭
亟行者第須精確公平勿徇勿濫足矣
又屯糧未完原計分數叅罰降調而督
臣謂侵漁抗肆豈僅一住俸調贖輕則
徒杖重則遣戍夫就侵漁屯課而言則
法司自有應擬之律惟在有犯必究毋

便倖脫可耳伏候

聖裁

一日結叅案

前件臣等看得叅問屯弁原因侵欠數多
故送刑部欲以完課正罪示法也乃督
臣已叅逮問蔡逢賜等就中多有虛數
捏完并抵俸了事卽借口赦蠲者均非
法之平也應如議聽督臣與屯臣提寃
追比第云屯官內有侵多抗提情罪重

者一面先行革去官職嚴行提問輕則
量行歸結重則或咨送法司或具疏叅
奏等語奉有

明旨謂是否典制着議來說欽此查

會典內開各衛所屯糧萬曆元年題

准未完二分以至八分以上分別印屯各官住俸降
俸降職至調衛差操而止又近該本部
題

准自萬曆四十年爲始自欠一分以上以至八分以

上亦分別印屯各官罰俸住俸降職本
至調衛差操而止而法加嚴焉此爲地
欠在屯丁者而言也然查

大明律一款內稱各處徵收在官應該起解錢糧有
侵盜糧一百石銀五十兩以上者問發
邊衛永遠充軍不及數者照監守自盜
本律發落此又爲侵盜屯糧者而言也
今督臣謂凡侵多抗提情罪重者先行
革職提問此謂年來舉劾不靈及叅送

亦套故欲盡法以懲奸貪耳然須酌量
輕重若果欠在屯丁自應止照例降調
若無欠戶而借口拖欠卽是侵欺若屯
丁執有收帖而屯糧未入倉庫則屯官
之侵欺益著嗣後屯弁有踵前弊者卽
行奏

請監追依律重處自是正法但不宜輕爲提問無端
摧折耳此後凡經南戶部與總督屯卷
衙門題叅侵糧衙弁查究明白叅送法

司務要實數全完實俸方抵不得此
狡口朦朧歸結庶頑并各知畏懼不至
失於骫縱矣伏候

聖裁

以上八款督臣與屯田御史相同者又
屯田御史所餘四款逐款開列於後

一曰懲豪右

前件臣等屯田

舊制原置屯以養軍故一軍止給一繇夫何法久人

玩有塚名領縣者有本衛官舍占奪本
官軍田者有勢豪典當一人占種數縣
者非惟占種占奪并所種所奪之糧公
然不納如御史任傑所陳者今

國家正在亟理屯政豈容官豪如此公占妨屯病
國也巡方職膺茲任亟宜清查應退出者退出應
完納者完納仍照

舊制一軍止給一縣毋容仍前占種占奪違者依律
重懲斯豪強知儆而屯田適均矣伏候

聖裁

一曰訪積惡

前件臣等看得剔蠹貴澄其源除害務去其甚今如屯臣所稱積惡宜訪拿者三焉一爲赤貧悍軍挾騙告害逋賦占種之家養爲前矛鷹犬致令屯官旗軍望而却走節年逋欠莫敢誰何者是也一爲積慣歇家包收各戶銀米任意侵那盜賣甚且遁同攢斗勒索留難不得入

倉者是也一爲積年識字領佃更繇作
姦移換種種情僞難以殫述者是也是
三者均不可使一日居其所相應如議
逐一訪拿內除無賴悍軍盡法究遣外
其歇家識字俱究賍論罪追克軍餉斯
屯蠹肅清而屯課自裕矣伏候

聖裁

一曰嚴操練

前件臣等看得屯軍不廢操練卽古寓兵

於農之意查鳳泗屯軍向屬留守甲兵
提督操練無爲州等營例應屯臣年終
選委衛官任之不意各官剝軍自肥毫
無實效今後仍以操練責衛弁而以查
核責該道與各府清軍官及京府治中
併聽屯臣總核如各弁中有仍踵習舊
開剋剝等弊不着實操練者卽革任改
委仍題叅究罪庶營伍克整而剋剝弊
絕矣伏候

聖裁

曰清屯運

前件臣等看得職業各有攸司屯運例宜
分別乃領運姦旗通同衛弁以屯軍而
差領運且以屯官而充運官荒廢屯田
侵逋屯賦職皆坐此釐奸剔弊之謂何
而可任此輩溷亂舊規爲也相應如議
禁約有犯叅處則屯官屯軍不混領運
而運不致妨屯矣伏候

聖裁

崇禎五年二月二十一日具

題本月二十四日奉

聖旨屯政積弛這條覆各款深於清釐有裨依議着
實飭行屯弁中如有侵欺抗肆的督巡衙門指叅
重究但不得擅行革職提問欽此

覆南臺謝秉謙軫卹江北災民疏

題爲災地與亂爲鄰饑民易致蠢動懇乞

聖明蚤計以固疆圉以重

陵寢事四川清吏司案呈崇禎五年三月二十六日奉

本部送准兵部咨開三月二十五日蒙

御前發下紅本該南京福建道試御史謝秉謙奏前
事內稱孔有德起自廝養怯援而逃寄命搶掠
以玉帛子女爲餌又散布不根語謂東人將坑
遠衆以恫喝之一時愚無知識惑而竄入故其

黨繁猥日盛耳設有以開其良心鼓其忠義
民用命孔有德無能爲矣然此猶已形之患也
若禍雖尚伏而著宜先計者無如淮徐揚鳳間
此地爲

神京咽喉

留都門戶

陵寢鞏固其人多剛悍勇決難化而易動去歲巨浸稽
天室廬資產蕩爲寒濤今年東作尚不可施將
來復業當在何日若復執而問諸水濱愚民無

知仁義挺而走險大可寒心邇東人避賊紛紛
南下者日以千百計漸集淮徐卽有姦細雜處
其間聞已有邏得者莽伏餘孽未易剪除必使
饑民有樂生之心則土著安而後可以綏客况
使流民有寧居之次則客戶定而後可以弭姦
民不然姦細與流民饑民合皆化而姦細也伏
乞

皇上勅下所司將被水郡邑先停徵比卽令撫按如
兩朝故事設法賑濟不使流爲盜賊旋議所以計籌

避賊之衆皆使樂爲良民人心既定賊勢自平
所爲今日慈防之先着莫要於此伏祈採納
行等因本年三月二十五日奉

聖旨遼人避難投東朝廷安撫有年正宜鼓舞忠義
勦奴除叛何得轉信流言自生疑畏這本說的
兵部卽行與督撫按各官明白曉諭其撫恤災地
流民等事戶部酌議具奏欽此欽遵備咨到部
批四川司議覆送司案呈到部臣等看得未
徹桑思患預防此謀

國至計也南臺臣謝秉謙因孔有德散布流言恫喝遼衆欲行曉諭散其黨與因而計及淮徐揚鳳被水郡邑又計及於東省避難之民恐其挺而走險化良民爲盜賊議欲先停徵比仍倣先朝故事截留漕粟數萬又給餘鹽銀兩及淮徐等倉賑採徐淮等處饑民以定人心而衰賊勢此其爲

留都

陵寢重地弭患於未然者意誠殷殷也第漕糧爲軍

國命庠未易輕截而錢糧官軍興匱乏亦難輕減
案查崇禎四年十月內該本部題覆直隸巡按
史堃併漕河部科諸臣勘實准徐揚鳳等州縣
被災疏內議得目今軍興旁午倉庾懸罄則漕
米顆粒俱京邊急需除泗州興化安東原係永
折桃源新題改折此外不得再爲開端輕議一
應起運京邊新舊遠餉俱入不當出毫厘難緩
淮鳳二府積疲州縣前已量減新增加派泗州
等十一州縣查照三年分派買遼米之數五年

分各減一半睢寧全免共減免買米一萬三千
四百三十三石零又將新增加派每畝三厘先
議桃源海州全免清河睢寧鳳陽盱眙俱免二
厘泗州邳州靈璧量免一厘五毫宿遷量免一
厘贛榆臨淮量免五毫俱係寬減永例非爲一
歲設者後又議極災泗州盱眙睢寧鳳陽俱全
免宿遷邳州臨淮各再減免一厘壽州虹縣五
河靈璧宿州高郵寶應興化泰州並減一厘俱
減四年分一年又鹽城罹災獨甚仍議改折崇

禎四年漕米一萬六千五百石其次災者不復
比例又極災十九州縣次災二十二州縣天啟
六七兩年京邊雜項遼餉業於四年夏月旱災
疏內題

請蠲免惟加派新餉未完尚在督催帶徵所當姑與
停緩俱奉

俞旨遵行在案是量減量緩蓋已恩施當厄而惠灑
焚黎矣今臺臣恐災地饑民易於煽動復以撫
綏爲

請臣部非不欲加意軫恤無奈時事孔棘

國用空匱業已減免勢難更寬則裁留漕糧與動支餘鹽等銀均未可輕議也且臣近覆按臣史望震陵之憂危一疏其流移東人業奉

聖旨著府縣官於預備倉穀及新餉雜項內量動賑給此外則計畫無復之矣無已或將所屬存留各項錢糧酌量緩急暫寬徵比以廣

朝廷撫綏之仁至於築堤以捍水患勸農以興東作安插以卹流移又在撫按督率道府有司等官

多方撫諭安輯加意防弭惠毋令森細無遺
民饑民及東人避賊之衆合而作彘貽毒地方
其所禪於疆圉不淺鮮也既經奏

請前來謹遵

旨酌議具奏恭候

命下臣部咨行撫按等衙門一體遵奉施行

崇禎五年四月初一日具

題本月初五日奉

聖旨災民自宜軫恤併賑給流移俱已有旨着該撫

按督飭地方各官用心設法撫輯必防不得但恃
呼籲其存留錢糧酌量緩徵依議行欽此

覆江北撫按題議禦外安內疏

題爲禦外計先安內伏乞

聖明寬恤以戢人心以固重地事四川清吏司案呈
崇禎五年四月初二日奉本部送戶科抄出鳳
陽巡撫李待問會同巡按直隸監察御史史堃
題前事內稱自萊州之圍彌月未解而人心轉
搖机也江北所在與東省爲隣贛宿一帶與東
登爲邇風鶴最易驚惶而長河綿亘千里盡屬
漕艘牽輓之地防範最難聯絡乃又當水災之

後阻饑之時無粟以佐無田可耕耕不足食
流移棲泊卽郡城號饑者且數萬計臣自去冬
分賑賑需今設處已竭查發俸廩銀六百兩計
遣歸農臣向亟亟計築新溝決口不特藉其
聊以贖其生也所最苦者生計日艱米價日踊
小民掘草根搗樹葉以捱朝夕而連日苦旱所
見冷風吹沙塞雲不雨若二麥仍復失收江北
之事安知所底頃海上攘搶之舡每有見告乃
徐州道臣一往宿遷而徐州葛口遂以流劫聞

總之民貧徹骨無以謀生而有司逼於考成徵求日憂不足其勢不驅之死亡盜賊不已鹽城興化哀楚更甚頃按臣會稿到臣懇乞

聖明量留漕米一二萬石以賑此流民此正當厄之惠

聖恩勤恤詎有靳焉至淮揚及徐州三處去年皆屬重災目下皆設重防臣不敢妄徵蠲貸惟乞

皇上特允按臣之請救此數萬生靈仍沛緩徵之令示以綏戢俟東防稍撤纔責徵補此收拾人心

計安重地之大機括也再惟今日防禦安嚴須
是道臣管攝得到彈壓得住纔有寧宇前疏派
廬州一道實非得已今部覆尚稽竊恐異日有
以指顧不及爲詞者矣至於道臣寥寥數人
遇遷去必別道兼署愈遠難周以後道臣員缺
就近推補凡有遷轉必責候新官交代而後離
任統乞

勅下部覆行臣等遵奉施行等因本年四月初一日
奉

聖旨請留漕糧及添設道臣已有旨了其緩徵及優代事宜該部酌議具覆欽此欽遵抄出到部送司相應議覆案呈到部該臣等看得江淮南北重地客歲罹水今春苦旱且淮揚濱宿徐州等處更有風鶴震隣之恐毋論啼饑堪憐抑且揭竿可懼所以撫臣李待問按臣史莖及南臺臣謝秉謙各具一疏或請撫綏或請緩徵雖入

告時有先後而實同一拯救至意也臣等忝爲民部豈不痛心疾首亟欲恤此災黎顧今四郊多壘

國用空虛漕糧轉輸尚懼難支匝歲京邊新餉益
苦入不當出且江北一塊土耳其前議減免召買
遼米及新增加派蠲緩天啟六七兩年京邊雜
項遼餉及加派帶徵未完新餉又以塩城被災
尤甚獨准折漕一萬六千有奇至於東省流離
之衆又議留新餉發贖穀以賑貸之矣昨覆南
臺臣疏議將淮揚存留各項錢糧聽撫按酌量
緩急暫寬徵比業奉

聖旨災民自宜軫恤件賑給流離俱已有旨着該撫

按督飭地方各官用心設法撫輯必防不得但恃呼額其存留錢糧酌量緩徵依議行欽此則

聖明寬恤之恩已至且盡而臣部調劑之苦亦似無遺術矣除兩經題覆減免寬緩外臣部惟日望有司輸此惟正以濟緊急軍儲猶惴惴虞不繼更何能增益於原題之外乎若夫禦外安內戢衆固圉想該撫按設法必防如

明旨所頒布者無容臣部更贅一詞矣再照疏陳江北道屬寥寥一遇陞遷必令別道兼署愈遠難

周以後道臣員缺就近推補凡有遷轉必候新
官交代而後離任良以地方但得監司彈壓人
心自覺震懾卽有攘搶等事可以隨時捍禦銷
彌隱憂雖藩臬舊無候代之例而地屬根本時
值倥偬誠有不可以嘗格拘者矣所當依擬申
飭併令銓部加意推補者也旣經撫按會題前
來相應覆

請恭候

命下臣部咨行撫按併知會吏部等衙門一體遵奉

施行

崇禎五年四月十六日具

題本月二十日奉

聖旨災地錢糧蠲停留折已有屢旨地方官着多方
撫恤以拯窮黎道臣督率有司尤屬要職見在的
果否勝任併近推候代事宜還着吏部議覆欽此

覆南京倉院條陳南糧諸弊疏

題爲南糧雖幸敷足外解弊端猶存謹據閱歷所
及敬陳末議以永裨軍需事四川清吏司案呈
崇禎五年三月十九日奉本部送戶科抄出巡
視南京營務兼管巡倉監察御史章金鉉題前
事等因本年三月十八日奉

聖旨該部知道欽此欽遵抄出到部送司奉此查得
南巡倉御史所陳條欵凡五如包攬之蠹習當
嚴船戶之裝載宜慎加耗之陋規當禁府佐之

督解當遵激勸之機權當申此數款者無非
奸祛弊剔蠹澄源均十糧運深有裨益相應
議具覆案呈到部該臣等看得留都根本重地
南糧軍餉急需邇年以來外解率多愆期倉庾
屢致告匱良繇有司人等沿襲弊端而振飭尚
未盡力耳南倉臣章金鉉身任倉差凡各倉中
種種陋習固靡不禁絕力行矣猶慮夫起運越
在省直者未盡規於畫一也條議五款非僅托
之空言實欲實見行事此誠對症之良劑而裕

儲之碩畫也既經南京巡倉御史題議前來相應依議逐款開列覆

請恭候

命下臣部移咨南京戶部并總督糧儲及南京都察院轉行巡倉御史一體申飭遵奉施行

計開

一包攬之蠹習尚嚴

前件臣等看

國家稅糧固患催科無法稍慮委解失人乃南糧

解納往往拖逋不能如期完型者良以解
役委非其人付之包攬積棍之手或隱匿
批文而展轉營運或投掛經年倩比延捱
種種蠹習難以枚舉三軍方枘腹待餉此
輩且咨意侵肥及至叅究嚴追脫卸無路
方思那湊補納甚至花費缺額還累無辜
幫賠包攬之流禍一至此哉今倉臣議欲
省直府州縣官嚴除蠹習凡倉點解役必
慎擇殷實之家方令承管敢有仍踵前弊

希旨包攬與者受者一體治罪斯肅習既
清而糧運自速矣伏候

聖裁

一船戶之裝載宜慎

前件臣看得省直運解南糧必僱覓船戶
裝載固舊例也乃此類溫飽守分者亦
有而赤貧嗜利者更多僱覓少不加慎
裝載盡付厥手始則視民膏

國課爲已物而任意侵漁繼且捫遭風失水爲故

習而多方遮掩坑陷官解賠累里甲家
可勝言哉今倉臣議嗣後必須責成州
縣官留心催覓嚴其認保毋令貧棍混
應斯役防範裝載重其經收更責官解
始終照管庶弊孔杜絕而狐鼠罔肆矣
伏候

聖裁

一加耗之陋規當禁

前件臣等看得有司徵銀加耗向來諸臣

論列頒布禁約不啻詳切卽微米加耗
頃南臺臣謝秉謙條陳亦經臣部酌議
具覆矣本色與折色原自不同雖加收
附餘以防汜爛朽腐亦糧運所不能盡
去者惟是明加之外復有暗增收糧佐
貳倉巡等官乘機厚斂至四五斗之多
蠹

國病民此何可不嚴行禁絕也今倉臣議欲痛革
陋規省直糧耗與糧耗之禁並行申飭

今令州縣正官查核鈐束有違禁者
叅報道府究處斯防微杜漸之深意實
寓撫字于催科之苦心也伏候

聖裁

一府佐之督解當遵

前件臣等看得漕白總部歲用府佐毋容
更議乃年來南糧督解南計臣督臣與
前差倉臣題

請通行不啻三令五申而省直各府尚率多用倉巡

驛使卑官屢致濡染侵漁稽遲其流弊
皆坐此也今該倉臣復申前議欲求

天語再加申飭務令省直與漕白同用府佐督解庶
猶鼠之竇塞而糧運之弊亦清矣伏候

聖裁

一激勵之機權當申

前件臣等看得勤勞

王事乃人臣職分之嘗而獎勵賢能實

朝廷酬敘之典如南糧督解必用府佐則府佐非卑

官可比明矣若猶似倉巡驛使之酬酢
不惟灰任事之心將何以妙鼓舞之權
而令省直府佐樂赴督解也今倉臣議
凡府佐押運南糧至萬石完納如期而
職守無玷者該撫按於薦剡外仍咨吏
部紀錄優擢斯臣工奉職益勵而運務
克濟矣伏候

聖裁

崇禎五年五月初二日具

題本月初四日奉

聖旨這等款項屢經條覆及至奉旨仍復虛玩何益
實事以後在差力行不必套陳該部覆疏正當參
酌可否何得槩以良劑石畫等語徇情塞責欽此

覆白糧量改限期隨漕徑進疏

題爲立限催償白糧請明

嚴飭以速民運事四川清吏司案呈崇禎五年四月
二十七日奉本部送戶科抄出總督漕運提督
軍務巡撫鳳陽等處地方兼理海防戶部尚書
兼都察院右僉都御史李待問題前事內稱專
管漕務右布政司錢士晉呈稱職生長東南資
知白解之苦近奉

功令革除向來買幫大害以及船戶關津勒索諸弊

督令尾漕踵進舊運有明效矣茲當新運蒙奉
部院奉

旨給單開兌開幫過淮過洪一如漕例職仰遵

新例白先漕後故酌議白服皆嚴於漕如二月初
十日過淮二月二十五日過洪三月初十日過
濟隨蒙本部院頒定各官解遵行訖不意歲潦
民艱僱船少費至三月初旬始報過淮逾限如
此安所逃白簡乎但職身經兩運熟查白先漕
後亦有難於盡拘者蓋漕僅脫粟白運必須春

辦漕係官艘民舫必須自催漕幫輕齊蚤給糧
解水脚繇閘等銀必須候領種種需時能令漕
幫停撓而待乎不便一運白之民卽輸漕之民
冬春官旗到次急如星火諸糧解勢必不能兼
顧如必緩漕急白計五郡漕粟實居天下之半
違誤恐多不便二抵通之期北直山東河南淮
北以及江南前幫到壩甚蚤伍郡僻遠民船難
於縮地爭先漕白軍民恐相凌害不便三抵通
矣必讓四百萬漕米先交鱗泊潞灣河清難竣

卽如四年到灣在六月終旣以漕兌相壓又
白剝剝漕守至九月方得入庾今更欲速其
益深不便四職愚見不若仍照昨歲俟漕幫
發白卽踵行軍民兩便伏乞題將白糧踵漕
進日期題改限單或五日或三日著爲成規
若漕幫已過或十日而白船未到官民俱無
處後至之討矣等因具詳到臣則知白糧之
不能先於漕者非復一端蓋上年因漕船阻
壓白船塞旨特允白糧出幫僨運該臣行漕
儲道酌議定以

期與漕舟兼進奉有

欽依遵照催督羽檄交馳不遺餘力然悉不能照限
遵行者緣有司旣急漕糧又急白糧止此時日
民力方圓何能並晝開幫之後漕白雜進聯帆
齊驅闢座每多爭擠欲速未免反遲法必期於
可久事不嫌於變通臣亦自悔乎前議之不審
矣然及今言之尚可更定俾行之咸宜而程之
有效惟當責令各道府有司悉照漕規緊接僉
發漕道以後勁之全力驅之如漕船過盡五日

後白糧不至雖至而不全幫盡到者臣等卽
以白簡照漕糧單限從重議處一轉移之間庶
漕白俱有定規永無凌兢矣謹會同巡漕御史
余城合詞具題伏乞

勅下該部酌議施行等因四月二十五日奉

聖旨戶部酌議具覆欽此欽遵抄出到部送司案呈
到部該臣等看得白糧開

上供漕糧係軍糈緩急輕重不容異視向年漕軍凌
白解漕船阻白艘乃有買幫守凍諸弊而

玉食錢糧愈遲東南民戶益苦是以臣部題奉
明旨禁革積弊聽令出幫僭護又經總漕部院題明
申飭有司十月開徵十一月上倉十二月歸船
正月十五日以裏開幫二月初十日過淮二月
二十五日過洪三月初十日至濟臣部覆奉
欽依通行欽遵在案其開徵上倉上船開幫與漕糧
同而過淮過洪過濟較漕糧新例仍蚤一月豈
非急公敬

上之極思哉第漕用官船而白用民船官者見成民

者催覓則淹速不敵也開徵開幫之期時日有限民力有限有司精神亦有限既急漕又急白勢不能方圓兼畫則先後難定也在途並驅開座既多爭擠抵灣守候剝運仍待漕完是民戶愈增其苦累而於

國計似未大有補也今歲立法之始上下竭力催儉然視原題過淮之期已遲一月則其難於越漕而爭先也審矣總漕李待問據漕道錢士晉條議擬將白糧緊接漕幫銜尾繼進不許出於

十日之外於以酌時宜而計長便誠恤民濟變之良策也漕臣初意本欲先完

上供而事理多所阻礙雖彈章屢騰無益者則不得不設法調停以歸於當益從閱歷體驗中來非徒以冥漠決事者矣雖然此道其常也漕船輸於七省豈無一二愆期白糧輸於五府亦有一二先發如必先白後漕或漕糧先至則不能待白以病漕如必先漕後白或白船先至又不能待漕以厲白也竊意開幫渡江後惟因其漕先

則先漕白先則先白卽有白船後至者不妨踵
漕以行卽有漕船後至者不妨踵白而發則往
年買幫守凍等弊庶可杜絕以信

前言耳再查漕糧近例以三月上旬過淮四月上旬
過洪而抵壩上倉江南限五月上旬浙江限六
月上旬今議白糧過淮過洪抵壩悉照該省直
漕限改上旬爲中旬明註限單俾其隨漕繼進
不許遲至經旬之外漕臣加意催督務在緊接
輸輓而尤嚴禁強軍凌壓弱解倘有徵收白糧

及給發水脚繇關銀兩踰期者罪在州縣有司
有中途延緩及船雖至而不全幫盡到者罪坐
總部府佐俱聽漕道糧道糾舉總漕巡漕以白
簡繩之庶民運不致受累而

上供亦可無稽延矣既經總漕臣會同巡漕臣題
請奉

旨酌議相應具覆恭候

命下臣部移文各該撫按總漕總河漕院漕道一體
欽奉施行

崇禎五年五月十三日具

題本月十六日奉

聖旨依議白糧量改限期尾漕踵進仍禁強軍凌壓
及水脚等銀給發愆期部運官中途延緩俱嚴行
叅處欽此

題立法督催起解拖欠布疋疏

題爲奸解經年延玩官布中途侵沉謹據實叅追
以完

上供以杜乾沒事四川清吏司案呈崇禎五年四月
二十七日奉本部送戶科抄出該本部題前事
本年四月二十六日奉

聖旨布疋宜責令正戶如期起解何故聽委奸棍積
年拖欠且責成部運府佐稽查交割旣奉有明
旨何不遵依爾部歷年何未見以功令叅處府

廳各官俱着查議仍嚴行申飭永著爲令本內
有名人犯依擬緝拿并提家屬監比見解的上
緊催完不許延縱該衙門知道欽此欽遵抄出
到部送司隨於五月初一日呈堂移文都察院
轉行五城御史蘇松巡按并各巡撫劄蘇松常
三府及白糧總部官與河西務鈔關查緝催解
去訖今奉有府廳各官俱着查議之

旨遵卽案查天啟六年十月內甲字庫題爲徵輸恣
玩已久守催事若罔聞犯心祈

聖明特勅該部遵

旨查叅并乞立循環完欠以濟匱乏等因十月二
十七日奉

熹宗皇帝聖旨內庭布疋禦寒急需已令差官守催
乃徵輸愆期好生恣玩着速造循環冊式頒行省
直上緊催徵各該巡撫御史照冊查比務將見徵
銀兩預期辦完委白糧總部官一同起運有徵解
不及額者嚴行叅處其守催官及經管怠緩有司
一併嚴查具奏該部知道欽此該本部於十二月

十一日覆奉

熹宗皇帝聖旨這額徵布疋拖欠數多該省直經管
官及守催官一體罰俸外休部卽將循環簿式嚴
行各地方所有完欠數目盡令開註如式解部以
便查覈尤着預催見徵責成部運官與白糧同時
起解至歷年逋負限每歲帶徵十分之三以甦民
困各該巡按官不時查比復命時將完欠開坐職
名具奏以憑獎罰處分該部知道欽此通行在案
今蘇州府每年額該棉布十四萬疋松江府無

年額該校棉布十三萬二千九百七十四疋常州府每年額該棉布四萬疋白糧府佐帶解布疋自天啟七年起查天啟七年分蘇州府總部同知劉成美帶解棉布十二萬三千七十六疋今本官已經察貪去任松江府總部通判李之佳帶解校棉布共三萬六千六百十疋今本官已陞兩浙運同見降二級常州府總部通判張四知帶解棉布二萬七千九十二疋今本官已經物故崇禎元年分蘇州府總部同知王德純

帶解棉布五萬四千六百五十七疋今本官起
經輩職松江府總部通判劉文煥帶解校棉布
共三萬五千十疋今本官已經察貪去任常州
府總部通判鄧履圖帶解棉布二萬五千三百
三十七疋今本官已見陞南京刑部浙江司主
事崇禎二年分蘇州府總部同知蔣爾嘉帶解
棉布六萬疋今本官已經開住松江府總部通
判楊泰初帶解校棉布三萬五千四百三疋今
本官已經開住常州府總部通判陳嘉績帶解

棉布二萬疋今本官已見降四川保寧府經歷
崇禎三年分蘇州府總部同知張爾棟全無帶
解今本官已見降河南按察司知事松江府總
部通判史秉鑑全無帶解今本官因遲悞三年
分白糧本部於崇禎四年十一月內題叅奉
旨降職二級又因遲悞新運四年分白糧過淮限期
本部於崇禎五年四月內題叅奉

旨再降一級常州府是年不委總部府佐官全無帶
解本司查議間五月十二日奉本部送准甲字

庫揭帖內稱南布拖欠甚多乞一併查議蘇州府自天啟三年至今共欠布七十二萬六千三百三十一疋節年止據嘉定縣聞或納布而太倉崑山二州縣並無起解常州府先年民解無欠自改官解扣尅增加粗短不堪自天啟三年至今其欠布十八萬八百六十二疋松江府自天啟三年至今其欠布八十七萬七千八百六十一疋三府向年間有解到率皆違式業屢頒樣申飭乃今非惟粗短塞責且竟寸縷無至查

天啟六年十月內本庫題立循環簿二扇按季
倒換貴部頒發之後完納數多其法甚善邇來
三吳民情奸宄將循環簿屢催不填是以起解
者經年無所稽覈而見辦者益以恣其侵漁拖
欠愈多鬆稀特甚成何法紀乞將循環簿仍行
申飭并令改機織造細密長濶合式布疋責成
部運同白糧解納務期歲額之數當年全完仍
帶徵拖欠分數庶

國計無虧而

內供軍衣不致匱乏等因到部送司奉批四川司查
議具題奉此又案查本部於崇禎四年五月內
查叅省直通布各官如蘇松常三府知府史應
選等并議自崇禎四年爲始各州縣徵銀完日
不必解府徑責殷實民戶取具親識保結卽將
布墊銀兩當堂給發本解刻期買布一面申府
起批坐委部運白糧府佐一同押解在州縣可
省轉解之勞在該府可杜那移之弊在

上供可獲及時之需等因五月十二日奉

聖旨俱依議欽此通行在案相應查議一併申飭案
呈到部該臣等看得蘇松常三府額徵布疋節
年拖欠豈盡欠於小民哉蓋非奸解之侵漁卽
係有司之那借遂致積欠數多臣部先於天啟
六年十二月內議將布疋責成白糧部運官督
押帶解良以白糧年完年額從無逋負其布疋
亦卽同白糧務期七八月間糧到布到九十月
間糧完布完更慮有司給辦而解戶藉口損墊
增價之未全發布疋起解而奸民中途花消質

易之未盡納乃議立循環簿二扇令該府填
完欠四季倒換內外稽查以杜作奸俱題奉

明旨通行欽遵訖詎意立法之始勉力奉行亦頗見
効而行法未久漸歸玩愒頗致廢閣於是臣部
節催部運帶解布疋而部運不應也節催該府
填註循環而該府不應也臣部以該府布疋不
完議留部運白糧總批不發嗣後有完年額之
半者有解年額之二三者總未全完臣業於崇
禎四年五月內將蘇州等府知府史應選等題

叅降罰其間或州縣之拖欠而累罰於府或該府之那借而坐欠於州縣法似未平隨議州縣徵銀完日隨盡給殷實民戶造辦合式官布卽行申府起批坐委部運司督解如地方掛欠責在州縣起解未到罪歸部運亦俱題奉

明旨通行欽遵訖目今

功令森嚴凡額解錢糧皆無容延欠而布疋獨泄泄如故則急公之誼安在也卽如松江府布疋起解頗多第包棍領解尚在中途觀望臣部因該

府申報據實叅追業奉

明旨隨卽行文催緝矣其部運府廳各官向係府縣
延緩未盡本官之咎然不追懲已往何及儆戒
將來合遵

明旨查議罰治今查自天啟七年起至崇禎三年分
止蘇州府部運同知劉成美已經察貪去任王
德純已經革職蔣爾第已經閑住統應免議張
爾葆已降河南按察司知事全無解帶布疋應
行見任罰俸一年松江府部運通判李之佳已

陞兩浙運同今降級帶解布計欠六分以上應
行見任罰俸半年劉文煥已察食去任楊泰初
已經閑住統應免議史秉鑑全無帶解布疋應
行罰俸一年常州府部運通判張四知已經物
故相應免議鄧履圓已陞南京刑部浙江司主
事帶解布計欠三分以上陳嘉績已降四川保
寧府經歷帶解布計欠五分二官應行見任罰
俸半年其五年見在部運官押解布疋應速行
文催解年終考核至於申飭循環臣部另立簿

式頒發各府自天啟三年爲始凡係布疋錢糧
有那移別用者卽議補還有已徵貯庫者卽議
給辦有已經發價而或掛欠損墊者卽議找給
有價墊全發而布疋未辦完與鬆稀不堪者卽
議查比有辦完起解而批廻未獲與違限日多
者卽議提追辰下責成撫按將蘇松常三府各
州縣布疋逐項清查一遍分別完欠備行具

奏仍造清冊報部存案以後各俱於循環簿內細
開州縣年分經徵職名發銀造布數目差委官

解姓名日期無論新徵舊欠逐項明白填註不
許遺漏按季赴部倒換以憑稽核各州縣徵銀
完卽擇殷實民戶將布價填墊等銀全發令造
合式官布印記責令正身起解隨卽申府起批
委部運官督押同白糧解納不拘新舊務完一
年原額之數能溢於額外者叅罰臣部每年俟
白糧到部之日課其布疋完欠查叅一次如州
縣職名年分下完欠多寡不一卽按數分別以
定殿最奸解中途侵費部運督解不前卽將如

解官一體叅處如該府循環簿填註朦朧倒換
後時罪在該府永著爲令務期遵守力行庶布
縷無積逋之弊而

上用軍需兩有濟矣相應併開各府欠數恭候

命下臣部移文應天撫按查催完解并知會吏部一
體欽奉施行

計開

蘇州府

天啟三年分欠棉布七萬七千七百六十

九疋

天啟四年分欠棉布九萬九千四百二十

疋

天啟伍年分欠棉布八萬六千八百七十

五疋

天啟六年分全完

天啟七年分欠棉布一萬六千九百二十

四疋

崇禎元年分欠棉布八萬五千三百四十

三疋

崇禎二年分欠棉八萬疋

崇禎三年分欠棉布十四萬疋

崇禎四年分欠棉布十四萬疋

以上欠棉布七十二萬六千三百三十

一疋

松江府

天啟三年分欠梭布六百二十疋 欠棉

布七萬五百六十四疋

天啟四年分欠梭布八千七十二疋 欠

棉布八萬六千四十七疋

天啟五年分欠棉布七萬六千四百四十

疋

天啟六年分欠棉布八萬四千七百七十

五疋

天啟七年分欠梭布九千四百二疋四厘

欠棉布八萬六千七百六十二疋

崇禎元年分欠梭布一萬六百二十疋五

分欠棉布八萬七千一百四十四疋

崇禎二年分欠梭布七千七百八十疋

欠棉布八萬四千八十七疋三分三厘

崇禎三年分欠梭布三萬三千疋 欠棉

布九萬九千七百七十四疋

崇禎四年分欠梭布三萬三千疋 欠棉

布九萬九千七百七十四疋

以上欠梭棉布八十七萬七千八百六

十一疋八分七厘

常州府

天啟三年分欠棉疋四千六百九十一疋

天啟四年分欠棉布二萬四千一百六十

六疋

天啟五年分欠棉疋二萬四千八百三十

四疋

天啟六年分全完

天啟七年分欠棉布一萬二千五百八疋

崇禎元年分欠棉布一萬四千六百六十

三疋

崇禎二年分欠棉布二萬疋

崇禎三年分欠棉布四萬疋

崇禎四年分欠棉布四萬疋

以上共欠棉布一十八萬八百六十二

疋

崇禎五年七月初壹日具

題本月初四日奉

聖旨這拖欠布疋各官着照例罰治依議富戶領價

辦納部運隨糧押解及循環簿頒發府官填註倒
換違者分別叅處自天啟三年爲始錢糧釐補給
發解戶查比追提等事俱嚴飭行併五年分的作
速嚴催起解仍着該撫按將各府完欠數目查明
奏報以便稽覈考成不得遲延庇徇欽此

覆御史劉興秀條陳江南六款疏

題爲微臣久吏江南稔悉地方利病謹陳膚見少

起民瘼仰祈

聖明采鑒亟

賜酌行事四川清吏司案呈崇禎五年五月二十四

日奉本部送戶科抄出廣東道試監察御史劉

興秀題前事疏開臣惟事

君之誼首重弗欺故言其所明不敢言其所不明也

今天下內外交訌兵食兩艱蓋擾擾多事矣獨

江南一片土稍稍寧宇然今日之江南非復舊
日豐裕恬謐之江南也雖輸將如故而窮簷積
貯半耗於醫瘡剜肉之催科雖安堵如故而民
莽戎心漸見有鹿駭狐鳴之異孽加以旱澇頻
仍奸宄百出嗟此一方其不登於衽席久矣
以地方急切利弊彙爲六款爲我

皇上陳之一公編審以杜偏累一束運弁以急漕
一除造訪以祛積蠹一禁罍鮑以安良善一饒
兵防以銷亂萌一清領解以饒

國儲以上六款皆平實切近卑論無高然吏治日
訛民生日蹙

國計半出江南邦本正須寧固伏祈

皇上留神垂察如果臣言可采乞

勅該衙門酌議施行等因具題崇禎五年五月二十
三日奉

聖旨江南財賦重地民艱可念奏內各款有裨釐恤
該部看議酌覆欽此欽遵抄出到部送司奉此查
照疏內條議六款俱於

儲民隱有裨相應照覆案呈到部該臣等看
吳民財賦獨甲天下

國用徵輸半出江南今欲裕

國而蘇民必先興利而除害臺臣劉興秀司理江
南洞悉民間利病于是條議六款繇耳聞目覩
之餘爲剔蠹釐弊之計誠對症之藥石而發部
之玄鑑也果能着實遵守竭力舉行庶

國計大有攸賴而地方補裨不淺矣臣等看議委
宜舉行謹將條議六款備列前件酌議具覆恭

候

命下臣部移文南直撫按轉行各府州縣一體欽奉
施行

計開

一原疏公編審以杜偏累江南僉審不平
多致逃亡破蕩其弊有兩曰花分者捏
出鬼名分立子戶曰詭寄者竄寄官戶
倖免差徭偏累荒僻不堪窮詰臣愚以
爲自今編審莫若行嘉湖兩郡事例計

畝授差如統計縣應役若干應由
干田多卽以一人兼數役田少不妨數
役朋一名而仍復通融設法令朋名
內願當者承役不願當者貼役若官役
須查憲綱品級照例倍免此外免其當
役止行貼役之法如是卽不必清花詭
而自息姦不漏差愚不偏因此亦經制
民生最均平直捷之一法也該臣等看
得江南差徭照田編審當僉審時民之

奸刁者或捏出詭名分立花戶或竄實
宦籍隱匿膏腴以致富民反得漏差下
戶多僉重役事之不平莫此爲甚以後
府州縣印官當編審時須嚴行歸併之
法先期懸示凡花分詭寄悉令收入本
戶奸民怙終不從必責本局呈首繩以
三尺斷在必行若徇賄囑欺瞞或憚豪
右曲護本局不首而爲他局舉發者除
本人究遣外該局俱連坐問罪庶花詭

之弊去而踐更之役平矣。曷荒田以
名朋當願者應役不願者貼銀累繫易
舉洵屬兩便。若其田多而產厚者卽以
一人兼數役無妨也。況花詭去則上戶
自多僉點又不患乏人乎。至于官戶查
憲綱品級照例倍免外其額外田數計
畝津貼上佐

公家之轉輸下蘓窮瘝之賠貲誰非臣子
諒列在縉紳者所不辭也。伏候

聖裁

一原疏東運弁以急漕允

國家漕粟大半仰給東南向者輸輓愆期有司動
被叅提運弁益恣咆哮臣愚以爲有司
奉職催科但可計倉庾之盈詘不能必
運艘之後先但可必小民之勉力輸公
不能必旗軍之俛首遵法所藉以督催
約束緊惟運弁是責弟此輩猶鼠同眠
鴟張易逞不惟勒索小民抑且凌轢官

府況近日

皇上加意武臣用軫時艱竊恐此輩妄窺

聖意罔將愈虐禍益不測乞

勅漕臣預行嚴飭出納期于兩平軍民各遵三尺倘
有倚勢虐民輕則懲治重則題參此亦
消弭隱憂刻不容緩之一事也該臣等
看得東南飛輓關

國盈虛轉運愆期叅罰不貸顧儲漕米急先發屬
有司之催科而領運腰約旗軍實運進

之職守第旗軍多勒索小民且凌轢官
府當起兌時輒勒私耗私耗之外又勒
使用使用之外仍有淋尖踢斛巧立名
色多方需索少不如意徒起四譁而運
弁猶鼠恬不爲誠軍強民弱莫敢誰何
宜

勅巡漕糧道嚴行申飭開兌之際出納兩平米必撮
揚民不得以濫惡充抵費必裁革軍不
得於分外苛求糧道不時臨視以防欺

謾如運弁不畏三尺恣令軍旗騷擾
允發已完不卽開幫者卽題叅究處度
允運便而民力甦

國計亦攸賴矣伏候

聖裁

一原䟽除造訪以祛積蠹巡方掣訪原以
鋤莠養禾今日竟爲東南第一禍本上
司行有司有司委胥吏胥吏通衙家竈
家公行賄賣稽良作惡每訪一次必有

數十家之破蕩流離數十人之死亡悲痛吳民之苦造訪甚于苦奴挿也臣懇以爲請遵

廟恩詔嚴行禁革按臣巡方之日第以告多者發審實則治罪虛則反坐倘府縣或有開報仍註所訪之人以便根查如是則豪惡何嘗不靖良善庶幾安生矣至若南臺諸臣奉

旨不許行訪然

功令雖嚴積套如故尤望

皇上再頒

嚴諭以杜此一番騷擾此亦轉妖孽而救塗炭之一
端也該臣等看得江南俗競民實豪惡
不少其嚙民之市魁積役之吞舟所肆
者僅僅繡斧之彈壓耳倘訪察不行譬
之造物有煦育而無雷霆其何能肅第
挈訪必行有司有司必詢胥吏於是造
訪之家受人金錢得以陷其所不快及

至對簿常無怙實而大奸巨慝交通衙役者反得漏網楊楊無忌矣臣以爲巡方者職在察吏安民必留心體訪毋輕寄耳目且惟知有風力者在地方久一切奸人素所指名者知之必稔令其確指開送如有不確還懲以惠文至吳中多巨族冠猴假虎目不識丁者嘗藉子弟父兄之勢以齟齬人爲害不淺宜勿徇情面悉行鋤治方見拔確風裁若止

取一二萊傭塞白則憲斧不靈將安用
之惟是搏擊僅行于按臣而寧少毋多
寧精毋濫偵訪繁寵于南臺無因豪惡
而禍善良庶幾政肅而民安矣伏候

聖裁

一原疏禁毆煞以安良善江南務本者少
游民呼群號稱毆煞列隊衝行殺燒劫
搶所在騷然見告此輩一唱千和主呼
輔應況復交通上下彌縫官府倘不除

其徒倡蔓而難圖久而叵測禍將不可
勝言矣臣愚以爲官府之禁不如地方
之自爲禁地方鄉有里長有率請以排
門之法挨丁卽以保甲之法按惡本鄉
本里月有呈報歲有申舉務使一夫有
一夫之本業游惰勸卽喇唬除約束明
則地方靖度幾刑政清簡化劒爲犢之
一術也該臣等看得市虎之有豈煞江
南之惡俗也此輩設壇結盟一呼百應

作耗鄉里白晝公行以至強奪人子
白搶人財物唆訟窩訪開場誘賭靡所
不爲且厠身衙役彌縫有司一有風聲
立時漏報滋蔓不圖禍且叵測但各郡
縣中鄉有正里有長請以排門之法查
丁卽以查丁之法祛惡大都申明保甲
十家各置一牌牌上列士農工商各著
本業其有不務生理游手好閒者卽
煞類中就中擇有生事啓釁者嚴責本

地鄉正里長月有呈歲有報有司依律
寃治倘有畏其凶鋒監不上聞者事發
之日十家一體治罪庶喇唬除而游惰
息共安于刑清政簡之化矣伏候

聖裁

一原疏飭兵防以銷亂萌江南水國也大
澤多有虺蛇萑苻每聞嘯聚今水兵陸
兵非不如故而政久法玩其大者如巡
海會哨影爲故事不過採柴炭運海味

甚至巡鹽賣鹽捕盜爲盜雖陸有鋪水
有哨而劫殺時聞熟寢不救陳防若此
實啓戎心臣愚以爲會哨宜申明也巡
捕宜約誠也兵備虛則整飭之事將領
懈則綜核之事著著實做件件嚴行務
使從新整頓積弊盡祛庶幾起敝爲強
未雨綢繆之一策也該臣等看得寇賊
奸究何地蔑有江南素稱澤國佳苻所
在見告銷弭宜周則軍容應勝今水陸

兵將非不具有尺籍而將多袴統兵皆
游棍如巡海會哨影爲故事甚而信地
劫殺多屬不覺踈玩若此何以戢奸糜
帑藏之金錢養盜盜之奸棍倉猝有警
備禦伊誰宜

初巡撫兵道申飭巡海巡捕將領員役加意簡練入
伍必挑壯丁較武必選長技使之悉心
組練嫻習弓馬兵道軍廳時加較閱投
醪示德貫耳伸威獎少勸多懲一警百

勿以他事擾之無事俾守牧圉以意
爲精銳庶備有可恃餉不虛糜撤素士
以謹衣初亂萌息而內地安矣伏候

聖裁

一原疏清領解以饒

國儲二南起解錢糧除金花京邊等項外餘如官
布段疋顏料各項強半皆積棍包攬此
輩視公帑爲私囊等性命于兒戲銀一
入手花銷盡餽莫可窮詰延捱動至數

年乾沒何啻千萬事未發則巧計彌縫
事一發則拚命監比甚至下水拖人搭

甲代乙

上供告匱大率繇此臣以爲自今領解俱委職官押
辦仍令職官同解尤當早給鋪墊毋令
藉口稽延至若起解在途墊價已足而
仍遷延不結者亟

勅撫按行令有司徹底清查有貨則押令到部無貨
則追銀還官此亦實漏卮而裕

國計之一策也該臣等看得江南各府錢糧除金花京邊外如官布段疋顏料等項每爲積棍串同衙役承攬包解及官銀入支視若私囊營運花銷有延數年不解者以致乾沒不貲及臣部再四催提輒以未領領墊爲解有司罔知查比

上供屢致空虛有繇然矣臺臣議委職官押辦同解早給鋪墊深爲中肯之論如官布一項

臣部題奉

欽依令州縣僉上戶領解辦造責令白糧部運府佐
押解卽此意也他如段疋顏料等項俱
以此意行之蓋職官自解則隻手何能
以卒辦解戶獨往則于適不免於逡巡
惟以職官押同解戶辦解則錢糧以互
稽爲愈明侵盜不旋踵而卽敗有容隱
不舉者追究職官有包攬匪人者貽累
正戶徹底清查或銀或貨無得兩地影
射其間予以杜漏卮而完

內供自裕如矣伏候

聖裁

崇禎五年七月二十八日具

題八月初三日奉

聖旨奏內各款關部已酌議停當着該撫按申飭有司悉心振刷務在釐奸剔弊弭盜安良如有玩愒不遵的不時叅來處治欽此

覆江北撫按備陳捕獲解散饑民疏

題爲災民因饑爲盜謹備陳捕獲解散緣繇仰祈
恩恤事四川清吏司案呈崇禎五年六月二十八日
奉本部送戶科抄出總督漕運提督軍務巡撫
鳳陽等處地方兼理海防戶部尚書兼都察院
右僉都御史李待問會同巡按御史史望題前
事內稱淮揚海上夙稱盜數數年之間稍幸波
恬蓋自去歲水荒與泰鹽城之民無田可種無
食可度故相率而事剽掠臣所在設厰賑粥極

兵嚴防歲盡正初晏然無恙頃三月以後賊
已撤而麥田失兩故一時惶惶思亂臣一面遣
兵擒捕一面出示曉諭幸

皇靈所攝或縛真盜以聽命或告執照以歸良一時
擾攘之景遂爾安於農畝此該道與有司將領
之力不可誣也乃臣竊以爲見獲各盜百餘人
雖多出於饑寒之迫體而就中爲戎首負隅招
黨殺越人於貨真所謂愍不畏法者臣業行道
分別審究其爲首數人法應梟示藁街以肅觀

聽馭亂用重典此渠魁之正法宜嚴也小民冀
真甘於從盜無奈衣食自窘徵輸浚迫故鹽民
黨聚卽以此爲言其勢誠急其情誠可矜矣總
之興鹽兩邑去歲無可收之田今歲有不耕之
上救死不贍賦從何出有司日惟鋏急日事鞭
敲畢竟莫有應者孰若恩出

朝廷可以結民情而定民志此緩徵之議宜恤也鹽
城范堤所以障海潮之入蓋自新蘇兩決內水
潰隄而出鹹水乘潮而入稻麥立枯此又鹽民

之獨苦者頃行馬知縣踏勘缺口十數處程
計料非萬餘金不可今惟就其緊急者右捷
天妃廟口二處勸助士民暫行補塞臣查將
缸工食扣存銀三百四十六兩零以益之其
未塞者尚多也臣念新溝之役鹽民所捐者一
萬兩工部覆奉

欽依照數補還正屬當厄之惠或以此補還之數爲
范隄修築之費亦所以阜土功寬民力乎但取
必於積欠之追恐成盡餅須得實在之銀給之

纔有着落此捍潮之堤工宜急也臣責任攸關
不避喋喋凡以爲地方寧宇計伏乞

勅下該部酌議上

請行臣等遵奉施行等因本年六月二十一日奉

聖旨該部看議具奏欽此欽遵抄出到部送司奉此

查得修築范堤事屬工部當卽呈堂移咨工部

備查去後七月初九日奉本部送准工部回稱

案查新溝之役本年三月內漕撫李待問議借

鹽城貯買漕米銀一萬兩應用伏該地方公派

補還總河朱光祚則議追山陽縣積欠河銀
用不足動修河米銀與還借造燬銀本部覆議
積欠追償恐難驟得合將貯買漕米銀一萬兩
先行支用仍卽以山陽縣積欠照數補還覆奉
欽依遵行在案今該前因查呈到部爲照范堤修築
計費萬有餘金漕撫議還新溝一萬兩取佐工
需而又慮積欠之追猝難應手查本部議追山
陽積欠之疏距今已四閱月該縣欠崇禎三四
兩年已三萬六千餘金豈催徵到今尚未滿萬

平河儲銀兩地方動輒支借日益負逋一遇修築而另煩設處亦非所以肅河政也應令山陽縣勒限補還以速工作毋徒藉口舊欠難償反滋緩悞咨覆到部送司查得漕米銀兩係雲南司所轄隨移送該司查得鹽城潰決隄口固當急行修築但所支錢糧各有項款如所貯買米銀一萬兩原係漕糧急需自應隨徵隨解何得泥彼注此且鹽城告困業准災折額數尚爾虧欠豈可復以正項之銀那爲別用乎雖漕糧河

工總屬

國事而部轄錢糧原有攸分合無咨行催督將前
項買米銀一萬兩作速解部以濟京軍米折急
用其修築堤口仍聽速催河工銀兩應用等因
呈堂奉批漕折不經題

請孰敢擅留築堤移咨速催仍於河工項下支銷奉
此除本司呈堂移咨督催起解外於七月二十
四日付覆到司准此所有原疏備陳四議相應
具覆案呈到部該臣等看得淮揚去歲水災重

大饑民困苦撫按二臣始督文武各官捕獲巨盜解散餘黨今復爲民祈

請緩徵示恤戡寇防患此其爲地方安堵計誠殷殷矣奉

旨看議具奏謹用次第酌陳一日該道與有司將領之力不可誣江北僻居海隅素稱盜窟兼以去年遭罹水患興泰鹽城之民無家無食日以剽掠爲事幸賴撫按亟督道將有司一面擒捕首從俱獲一面撫諭解散歸良此實該道有司躬

先董率與兵將奮力擒捕其勞誠不可泯夫失
事旣責成於所司而安懷弗錄敘以鼓舞則將
來何以使文武之盡力於疆圉哉合應移咨吏
兵二部查明職名酌議紀錄以示激勸者也一
曰渠魁之正法宜嚴失饑寒迫而爲盜滋蔓久
則難圖今巨盜韓四等廿爲戎首愍不畏法始
而倡亂居先繼而招衆刼殺渠魁肆惡鯨鯢當
除况秦晉之毒皆繇此輩醞釀所當如議繩以
重典速行梟示以爲懲創其兇獲各盜吳來興

等百餘名仍聽彼中分別究明各擬本律毋枉毋縱者也一曰緩徵之議宜恤夫民隱固所宜矜而

國計亦所當籌案查鹽城興化泰州三邑先該臣部議將召買五年分遠米各免其半又崇禎四年十月該臣部題覆巡按御史史莖併漕河部科諸臣勘實被災疏內將興化泰州所增加派三厘四年並減一厘鹽城災甚仍議改折四年漕米一萬六千五百石天啟六七兩年京邊雜

項遼餉題

請蠲免帶徵加派新餉未完亦與停緩本年四月內
又因南臺謝秉謙一疏將存留各項錢糧暫寬
徵比續因鹽城災民成世傑等具奏臣部議將
新增三厘銀三千六百餘兩量蠲五年一年舊
逋銀兩暫行緩徵是三邑者蓋已恩施當厄而
惠灑焚黎矣今撫按復因興鹽泰州等處去歲
無可收之田今歲有不耕之土救死不贍賦從
何出欲祈恩出

朝廷再爲緩徵惟是江北今歲又苦水災見今移文
查勘姑俟至日另行軫卹者也一日捍潮之隄
工宜急夫築隄以捍水患臣部於本年四月內
題覆災地與亂爲隣一疏蓋亦詳哉言之所望
撫按督率道府有司多方芟防弭患耳今撫按
二臣欲將工部補還鹽城所捐新溝銀一萬兩
爲修築范堤之用又准工部咨稱欲將漕折銀
一萬兩先行支用俟追山陽積欠補還不知前
項銀兩原係京軍米折急需豈敢擅留以爲築

堤之用合無移咨撫按督催作速解部其修堤之費仍如總河與工部所議動追山陽積欠河米等銀或聽彼中動支河工本年見銀另爲設處毋煩臣部再議者也既經撫按二臣具題前來相應覆議上

請恭候

命下臣部移咨淮揚巡撫及咨都察院轉行巡按御史併咨吏兵二部一體遵奉施行

崇禎五年九月初五日具

題本月初八日奉

聖旨依議行欽此

覆良鄉縣解官失事賠銀疏

題爲縱盜肆行殺劫違

旨延害卑官懇乞

俯賜憐豁以懲巧脫以飭法紀事四川清吏司案呈
崇禎五年五月二十九日奉本部送戶科抄出
總理戶工兩部一切出入錢糧事務司禮監監
官太監張昇憲題稱據直隸淮安府鹽城縣典
史張國賢告前事看得各省直起解錢糧俱屬
軍

國急需沿途經過地方原有護送之例府州縣互相隄防緩急自可力保無虞今張國賢解銀抵良鄉縣南十里舖被強賊四人劫官銀如入無人之境知縣吳宇英捕官由于挺等均有地方之責何辭疎虞之處被劫銀兩營衛軍兵難派共扣銀一千二百八十兩其餘四百九十兩應于原解名下追賠廼張國賢猶曉曉不已彼蓋藉口強賊閭壁舉等已經錦衣衛緝獲人犯既在賊必具有但不知原賊有無花費追出若干

或係原追之賊量抵賠補之數無使窮途卑官
有向隅之泣可也伏乞

該部查解官張國賢派賠銀兩錦衣衛所獲強
賊閻璧舉等有无原贓可抵備查明白仍將知
縣吳宇英等重加降處懲儆將來等因本年五
月二十八日奉

聖旨該部知道欽此欽遵抄出到部送司奉此案查
崇禎四年十二月初八日奉本部送戶科抄出
巡撫順天都察院右僉都御史傅宗龍題爲響

馬截劫銀鞘事內稱據霸州道兵備右叅政張
耀采呈據良鄉縣申稱閏十一月初九日有淮
安府委官張國賢解銀一十六鞘行至興州中
屯衛蕭家庄地方被響馬強賊四名劫去銀一
鞘有餘適職途聞被劫卽率馬快撲救賊見官
兵追趕甚急忙遺鞘內銀十錠大封三封點驗
交付解官隨卽尾後追襲分遣官夫四散躡緝
營衛官軍並伏路馬兵未見一人跟捕以致脫
逃又准分守涿州副總兵管叅將事馬如錦手

本據家丁報稱蕭家庄地方有強賊四人將家
丁射散截住張解官鞘車劈開鞘皮劫去銀三
十八錠從縣西奔走訖本營聞報飛馳追跟並
不見印捕之面然則蕭家庄之劫鞘將誰執其
咎乎除嚴批該道責成馬如錦並將衛印捕官
勒限緝賊如不獲照例議處外謹會同巡按御
史吳阿衡合詞以

聞等因崇禎四年十二月初七日奉

聖旨劫鞘盜止四人全無勦禦營將及縣衛印捕各

官所職何事尙彼此委卸好生玩肆都着住俸戴
罪勒限緝拿過限不獲叅來重處其失去銀兩着
照例賠解該部知道欽此四年十二月十一日又
該本部題爲恭報起解錢糧事本月十二日奉
聖旨起解錢糧經過地方必須防護催備屢旨嚴飭
如何泄玩不遵這潘有渭張國賢解銀弁兩淮塩
課見到何處俱各着撫按督催前來不許延悞其
失水被劫的着地方官速行賠補違的叅處欽此
欽遵通抄到部送司奉此遵卽呈堂咨行撫按

一面將各官住俸戴罪勒限緝賊并督催所解銀兩鹽課前進一面將失水被劫等銀着地方官速行賠補去後至崇禎五年三月十三日奉本部送准順天巡撫傅宗龍咨稱據霸州道詳議營衛軍兵攤賠銀一千二百八十兩解官張國賢派賠銀四百九十兩共足失去銀一千七百七十兩之數應着上緊措納又奉送據張國賢告稱昨蒙撫院咨議攤派營衛軍兵賠銀一千二百八十兩暗裁解官賠銀四百九十兩據

此銀數尚少原盜鞘銀一百三十兩與馬叅將
及撫院奏䟽不符乞再一併着落隨蒙本部移
咨再議續於五月十二日奉本部送准順天巡
撫傅宗龍咨稱看得張國賢哖哖爭辨止以原
數開載劫去銀三十八錠借口耳然原䟽所據
者叅將馬如錦憑信車戶之言倉皇具報而當
日永清李知縣會同良鄉縣馬叅將在縣堂據
解官亦止云三十六錠合之錦衣衛已獲強賊
閻璧舉等所供及衛䟽俱云三十六錠則實止

失銀三十六錠安得復稱三十八錠乎除將營
衛賠銀批令徑解外其張國賢派賠銀兩應着
措納等因到部比張國賢因見撫院覆咨先令
賠銀四百九十兩後又混推無着落銀一百三
十兩加賠情極一面赴總理衙門控告一面復
赴本部具詞呈告間五月二十一日又奉本部
送據良鄉縣知縣吳宇英申同前事內稱失事
原係興州中屯衛地方況緝賊護餉責成營衛
官兵舊案昭然該涿州署印永清縣知縣李鑑

查照萬曆四十二年有淮安府解官朱家臣等
解銀至涿州北門甕城內歇宿失事查得前項
鞘銀雖係本州着落甕城安置事屬同舟難分
彼此但解官職司管解亦難辭責失銀五百五
十兩涿州守備與該州吏目胡桂并解官三分
均賠近日武清失盜該李知縣查例議酌解官
田濟世均賠今該州遵奉照例賠解之

旨例應責成營衛併解官賠銀等因到部奉批准安
解官典史張國賢行至良鄉失事共銀一千七

百二十兩查係管衛地方共令賠銀一千二百八十兩而該縣不與焉固已幸矣又援萬曆四十二年之例欲令解官賠銀四百九十兩今昔事體不同銀兩多寡亦異且與

明旨所云着地方官速行賠補者頓異此等斷案似情理所不載也況解官以爲三十八錠而縣審以爲三十六錠已自有詞可重累乎此事該縣似不能脫然無累者該司卽查議確行奉此查得張國賢苦稱劫銀三十八錠乃叅將與撫院

以前題報之數而今咨又據縣審三十六錠
所少銀一百三十兩雖難重累然比時倉卒未
經備細驗明情或有之合將前銀姑議國賢賠
補其前少銀四百九十兩乞咨撫院着落該縣
議處完足併營衛攤賠見在銀兩俱星速解部
以便題覆奉批據議已安准照移咨奉此復經
呈堂移咨撫按遵照去後隨據興州中屯衛差
官李弘經等于本年六月十四日先解營衛攤
賠銀二千二百八十兩又於八月初九日續據

良鄉縣差役申解賠完銀四百九十兩俱先後
到部劄庫收納訖今于八月十二日又奉本部
送准刑部咨稱先該總理太監張彝憲題前事
奉

旨科抄到部查得張國賢領解銀兩被劫除營衛軍
兵攤賠外尙少銀四百九十兩據稱強賊旣獲
似可以原贓量抵但查強賊閻璧舉陳嘉賓等
所劫於良鄉者花費無存而通州所獲閻璧舉
趙江銀十六錠陳嘉賓招內王二銀十錠俱經

錦衣衛解入內府並未到部無從取抵等因奉
年七月二十八日奉

聖旨既奏盜賊既經交庫張國賢派賠銀兩饒了罷
欽此欽遵抄部送司案呈到部爲此合咨前去
煩爲查照

欽依內事理即將張國賢派賠銀四百九十兩免追
等因到部奉批四川司查行又奉送據解官張
國賢呈爲懇恩遵

旨全豁事切賢被劫銀兩先該營衛攤解銀一千二

百八十兩今良鄉縣又解到銀四百九十兩是
所少者派賢賠銀一百三十兩但前銀袁借無
門昨該刑部題奉

明旨張國賢派賠銀兩饒免欽此則國賢派賠銀兩
已沐

恩免懇乞批司將賢免派銀兩明註剗庫庶解額無
虧奉批四川司查奉此查得被劫銀兩營衛良
鄉俱已解到無庸再議惟是張國賢所派銀一
百三十兩未納今據國賢呈謂刑部見經題有

赦免之

明旨乞祈豁免應否准從相應題

請案呈到部該臣等看得解官張國賢被劫官銀一
案始因該撫咨議營衛攤賠銀一千二百八十
兩國賢賠銀四百九十兩繼因議賠之外尙少
原盜鞘銀一百三十兩故訴總理與臣部而總
理與之具題意欲以盜贓准抵業奉

明旨戶刑二科各抄到部在臣部因遵地方官速行
賠補之

旨且今昔事例不同營縣豈宜異視故將四百九十兩批令良鄉縣處賠一百三十兩比因劫掠之時未及驗明交割故將此無着落之銀議國賢賠補以足解額今刑部祇知四百九十兩爲國賢擬賠銀數業與題覆奉

旨張國賢派賠銀兩饒了罷欽此夫該縣所賠之銀原卽國賢所賠之銀

聖旨所免四百九十兩今該縣已解完四百九十兩外國賢應補一百三十兩茫無着落將欲復追

國賢彼謂已微

恩免則此一百三十兩卽當奉

旨饒免其四百九十兩該縣旣已解到仍應納庫以
補缺額至于知縣吳宇英叅將馬如錦先因地
方失事奉

旨住俸戴罪今查失事原係營衛地方況盜已就獲
銀已賠補則後來之急公可補前日之踈虞臣
等仰遵

前旨酌議合無將吳宇並馬如錦姑各罰俸半年免

其住俸戴罪而衛捕各官田于埏等仍當行令
撫按衙門從重戒飭示懲者也既經該司具呈
前來相應覆

請恭候

命下容臣等咨行各該衙門一體遵奉施行

崇禎五年九月初八日具

題本月十一日奉

聖旨解官不以錢糧爲重致被盜失職守何在況營
縣代償數多其零銀仍着張國賢賠補前刑部原

應查明何乃勝請吳宇英等俱依議欽此

覆鹽城興化等州縣水災賑卹疏

顛爲水災歲甚一歲小民日苦一日計窮救死望
迫更生仰乞

聖明廣沛恩恤以救顛連事四川清吏司案呈崇禎
五年九月二十九日奉本部送戶科抄出總漕
部院李待問題前事竊照去歲之水城溺堤沉
民無所定蒲望今歲有收可以裨補蘇息不意
益之降割比去歲加甚焉該臣等再疏報

聞大抵今歲之災除廬州府及滁州外盡成巨浸如

鹽城縣山陽縣海州桃源縣清河縣安東縣沐
陽縣贛榆縣邳州宿遷縣睢寧縣潁州霍丘縣
臨淮縣寶應縣徐州沛縣宿州盱眙縣興化縣
亳州皆已經疏題者也又有碭山縣和州虹縣
潁上縣太和縣靈璧縣鳳陽縣高郵州豐縣蕭
縣蒙城縣皆陸續報臣者也內鹽城興化睢寧
寶應邳州山陽之士民又日日呼籲臣衙門必

欲臣專疏請

恩愧無詞以謝之也且如鹽城一縣之民流離死徙

十已七八卽結葦編筏于淮城東門之外何啻
數萬人此輩從水中拾得性命出來牽兒携女
乞食度日何物可以養贍向年水災一過生計
盡矣陷溺不止謀生無路竟有携妻躍入湖心
而死者臣一聞此不覺失慟而臣之肝腸爲摧
矣過此以往徂秋及冬饑寒切于肌骨性命急
于廉耻恐事有不可言者何道可以活其命而
固其心憶今歲二月旣望淮城內外粥廠苦于
錢糧難處議停撤之而饑民號食不散不得已

又添資至三月臣復散賞七百餘金而後歸
若論今日卽資粥亦止饑民比去年加多時日
比去年加遠而摻括處置比去年加窘此事理
之顯然者也鹽城漕米去歲荷蒙

聖恩准折一半臣復借漕米銀一萬兩以贍之纔能
了事至今漕折之銀分毫未有也欠臣漕米之
銀分毫未有也京邊軍餉又分毫無有也知縣
馬文耀之失民心論者亦謂七月開徵過迫致
然頃委同知劉志斌署事而與臣約謂一議催

科將爲馬令之續矣民方蹙額相向有司如何做手此事理之顯然者也去歲各州縣水雖發而盜未興小民忍飢忍溺不敢非爲似有從前之積蓄可支也今歲水患仍是去歲被災州縣連年潦沒徹底窮迫百姓祇剩此身耳又無以餬其口頃高寶間盜風颶起勢幾岌岌幸已擒散畢竟陷溺之衆安頓無所觸目隱憂何啻蕭牆此又事理之顯然者也臣與府道州縣諸臣日講拯救之方惟是那庫銀以速糴給路引以

招商弛力舍禁寬之俾有生靈相安
或無生心顧災爲數十年來所未有
小民已到
萬分艱難處決非小小補助所能挽回而綏戢
之者查江北災沴時見

列聖恩恤有加或發賑帑金或撥賑漕米或蠲見年糧
稅或減來歲田租舉其近者萬曆四十三年曾
留漕折馬價等銀七萬以賑飢民崇禎三年

皇上恩顧西陲沛發帑金十萬兩于惠元元蓋高興
厚後先一揆已試觀江北地方何如關係今日

汧災何如重大民之號號在疚何如苦楚

皇上超然遠覽幽隱羅照蓋不必披監門之圖而憫
乎有如傷者請賑請蠲民情俟望甚殷奇窮飢
渴甚迫所謂

皇上特沛恩膏起白骨而肉之爲溝壑餘生一造命
也乃臣復以爲遼米之當省也折色之當議也
粥米之當處也緩徵之當酌也堤工之當修也
凡此皆去年備嘗之艱苦亦去年仰丐之

恩施然而酌時揆事止有此數抑且得生失死正在

此時臣責在地方職惟撫字卽欲隱忍不言
不可得已謹會同巡按直隸監察御史饒京會
詞上

請伏乞

聖明憫念窮黎

沛發洪惠併

勅下該部酌覆行臣等遵奉施行等因崇禎五年
月二十六日奉

聖旨覽奏窮民再罹水災殊切憫念疏內寬恤事宜

卽與酌覆應修隄工著河臣勘奏該部知道欽此
欽遵抄出到部送司奉此查得疏內五款除隄
工當修一議業已奉

旨遵卽呈堂移咨總河部臣勘奏去訖其遼米當省
事屬新餉司折色當議粥米當處係雲南司隨
卽移付會議間十月十五日又奉本部送戶科
抄出巡按直隸監察御史饒京題爲鹽城災地
有邑無民有官無法謹以水盜情形上呈

聖覽仰祈亟

賜拯救以安一方事內稱塩城水盜情形朝多難
該縣本折錢糧實無從出惟望先爲議行蠲免
臣等奉職無狀乞罷臣以謝地方等因十月
三日奉

聖旨該部知道饒京着遵屢旨用心拯輯不必空
求罷欽此遵卽一面呈堂移咨都察院轉行本
遵

古拯輯外至十月十八日又奉本部送據興化縣鄉
官原任兵部等衙門左侍郎等官魏應嘉等

爲疲邑叠災貼危已極錢糧無措禍患將深敢
陳顛末望乞徑援急救生命事內稱興化地最
窪下崇禎四年五月至七月淫雨晝夜傾盆縣
縣田禾盡沒於水至五年春水退田出百姓三
四月間方得佈種不意淮安山陽建義等口大
決而水盡注之興化將熟稻田盡沉水底百姓
逃亡強半而不逞者乘水嘯聚比昨歲更烈若
非漕折盡行蠲免破格大加賑濟予遺且無殘
喘隄口不塞縣治將陷爲江湖運鹽河運糧河

沒溺漂沉每年漕糧鹽課及各屬額派錢糧數
十百萬將何所出鹽徒大盜將紛紛而起

畿輔南北尚有安枕之日乎此嘉等今日惴惴
深抱杞人之憂者也總之治標惟在蠲賑治本
惟在堵塞庶無妨

國家萬年之大計等因奉批四川司查議十月十
九日又奉本部送據淮安府海防同知劉志斌
申爲亂邦危篆不允堅辭謹瀝血預鳴難苦乞
免糾叅事內稱今連荒倡亂之鹽城一望水光

十室九竄揭竿斬木嘯聚之徒不下三四千其
舡不下八九百官兵追勦颺去倏來此外皆予
遺轉壑之餘生嗷嗷望賑鳩形鵠面痛心酸鼻
長民者尙忍向若輩徵錢一鎰科米半顆乎所
轄錢糧分毫無解若不及今聲明迫至列名露
章噬臍何益等因奉批此詳備陳鹽城之災傷
當於題覆疏中酌之四川司查行奉此查覆聞
十月二十八日又奉本部送戶科抄出直隸楊
州府高郵州興化縣災民張有德等奏爲疲邑

連年大浸予遺殘命難存災患異常情勢迫切
謹匍匐額

天急祈蠲賑以解萬姓倒懸事內稱興化僻處海濱
地勢窪下四面受水素稱釜底查楊州一府興
化田地不足十之一錢糧已踰十之三雖在豐
稔猶苦那湊然未有如崇禎四年七月內霍雨
盆傾淮黃交潰水深一丈五尺田舍漂沉老弱
溺死少壯逃避比之丘焚未有此慘撫按具題
仰蒙

聖恩量減新增遼餉三厘之一延至今年三月窮民
鬻妻租牛買種從事南畝不意六月黃河漲溢
河口潰決合縣內外陡深一丈六尺將田禾廬
舍盡付洪濤巨浪且水滄城市深至五尺較之
去歲其害更慘今萬姓嗷嗷寄命波濤之中貼
危至極無米無薪十月以後風凜水結飢寒迫
體勢難存活而再迫以催科未有不挺而走險
者今檄頒水次議徵漕米其如骨髓已乾毛血
俱竭何伏望

皇上垂念下邑窮黎受此兩年大災特將本年漕折
新舊遼餉及一切逋欠錢糧俱賜蠲停速發
帑金大加賑濟庶垂盡殘喘或有更生之機等因
十月二十五日奉

聖旨戶部知道欽此抄出到部案查本年八月十四
日先奉本部送戶科抄出總漕部院李待問題
爲地方極災接踵民不堪命謹據實報

開徵

恩拯恤事八月十一日奉

聖旨戶部知道欽此又八月十九日戶科抄出巡按
直隸監察御史饒京題爲黃河漫漲江北再受
水災盜賊蜂起微臣目擊心憂謹據實奏

聞仰祈

恩恤亟救殘黎以靖地方事八月十八日奉

聖旨據奏地方災盜情形亟宜修拯銷弭饒京着會
同該撫嚴飭道府有司撫字流離勦戢嘯聚卹荒
剪亂以安重地如各官有縱玩溺職的叅來處治
仍一面將被災實情勘明具奏該部知道欽此又

八月二十六日戶科抄出總漕部院李待問題
爲水勢日甚一日地方覆溺可虞謹續疏報

聞仰丐

天恩賑恤事八月二十三日奉

聖旨覽奏江北水患異常河淮衝決甚險民艱運道
俱屬可憂朕心惻然

祖陵重地着加意防護不得刻懈卿還嚴飭道府有司
料理拯救靖盜安民以副委任不必引請所有撫
恤事宜該部酌議具奏欽此欽遵通抄到部送司

奉此查總漕部院李待問與巡按御史饒京前
後三疏備報江北被災情繇俱遵

旨咨行撫按一面嚴飭所屬撫勦卹亂以安地方一
面將被災州縣速勘明確具奏復于九月初三
日再行移文知會併議撫恤去後迄今勘報未
到茲復奉

旨寬恤事宜卽與酌覆欽此又准雲南新餉二司各
會議前來相應一併題覆案呈到部該臣等有
得救荒苦無長策惠民惟賴

生恩雖當

國用告乏之日而值青災特甚之鄉則權事變以恤民生寬一分卽受一分之賜有不得不破格上

請者今據總漕臣李待問始題水災重大地方則有鹽城山陽海州桃源清河安東沐陽贛榆邳州宿遷睢寧潁州霍丘臨淮寶應徐州沛縣宿州盱眙興化亳州二十一處繼報同被水災地方則有碭山和州虹縣潁上太和靈璧鳳陽高郵

豐縣蕭縣蒙城十一處而尤諄諄以塩城興化
睢寧邳州寶應山陽日日呼籲衙門無詞以謝
爲言又該巡按御史饒京復具疏爲塩城

請命又該塩城署印同知劉志斌及興化鄉官魏應
嘉等災民張有德等極陳二邑流離瑣尾之狀
至不容口臣等訪之士紳詢之道路今歲江北
陽候之厄委出尋常災傷之外就中分別輕重
次第則先塩城次興化又次睢寧邳州而山陽
寶應等邑雖昏墊不免而猶其後也謹就總漕

李待問原題優恤五事酌議具覆一曰遼米當
省查召買遼米一項原備津門海運之需先准
總漕題報江北水災臣部卽于預計崇禎六年
關寧糧料疏內議將淮安府津部派買遼米二
萬五千九百四十九石全免廬州府津部派買
遼米二萬二千二百八十八石減定止買二萬
石鳳陽府津部派買遼米一萬九千五百十三
石一斗減定止買一萬二千石揚州府津部派
買遼米二萬二千三百二石七斗減定止買一

萬四千石無論被災輕重地方通行優卹業已奉有

明旨今毋容再議也一曰折色當議查得鹽城縣崇禎四年漕糧先該臣部題議改折一半該折米一萬六千五百石今漕折銀尙未解也興化縣四年原未改折止於新增加派三厘內減一厘以寬民力乃今歲則水災更甚矣廬舍隴畝盡歸巨浸父母妻孥相繼化離其五年應徵漕糧業已苦無從出而猶催科不已不將令民挺而

走險乎合無將鹽城漕糧三萬三千餘石盡數
折色每石八錢其耗潤輕膏蓆易等項俱在其
內但恐漕折亦不能辦仍姑與停徵以俟明歲
之秋成則鹽城有更生之望矣興化除舊例永
折二萬石外仍該漕米一萬二千八百七十五
石九斗姑再量准改折一半每石八錢睢寧漕
糧一千一百石邳州漕糧二千一百五十六石
三斗五升亦准改折一半每石八錢三處漕折
俱照鹽城之例亦俟明年秋成完納所餘一歲

照舊兌運無容寬假其他州縣遵照漕規開兌
開幫不得援以爲例者也一日粥米當處查得
漕撫疏稱去歲隨地設廠月費八九百金所在
倉穀給發頓盡今饑民日多冬寒望賑欲留漕
米二三萬石分廠煮賑不足再留積穀充餉之
銀以益之此實救民良法第恐京儲太損似難
槩徇惟將前任巡按御史史堃積存見貯穀一
萬六千七百五十石聽其支用如再不足准於
淮揚二屬州縣舊餉款內積穀二分充餉銀數

姑准暫留五年一年以應其需可也一日緩徵
當酌夫民力雖屬有限

國用要自無窮況今京邊遼餉入不繼出久矣除
前開四州縣量將漕折銀兩寬至明年秋成征
其餘似難輒議緩徵以啓百姓逋負之心合無
將本年存留錢糧暫緩徵比舊逋銀兩暫緩提
解俱以明年麥熟行催其餘見年京邊遼餉照
舊開徵但於疏中開列被災州縣稍寬考成之
例通與展限半年如舊例年終考成十分者今

止考成五分俟明年六月終旬方行考成十分則於

國無損而於民有益矣既經淮楊撫按二臣具題前來相應覆議上

請恭候

命下臣部移咨鳳陽巡撫及咨都察院轉行淮楊巡按御史一體遵奉施行

崇禎五年十一月初一日具

題本月初五日奉

聖旨這寬恤災民如遼米改折煮粥緩徵考成各道
俱依議其道府有司鄉紳富戶有能設法賑濟好
義恤貧的撫按官具以名聞至被災緣繇皆係河
決浸灌總河官職掌所關且事權甚重錢糧不乏
何故先時不行修築致茲昏墊民命何辜國課何
賴該部卽行嚴飭欽此

覆泗民被溺安集蠲卹疏

題爲泗民被溺安集宜先謹據勘實會彙往例懇
恩大賜蠲恤以永奠

根本重地事四川清吏司案呈卷查崇禎四年十
月二十八日奉本部送戶科抄出總理河道工
部尚書朱光祚題前事內稱准巡按直隸監察
御史史堉會彙爲照泗上

陵工號曰基運是我

皇明億萬載無疆之曆實始基之而今大稔懷山泗

城沼吳民維魚矣龜產蛙而蛇龍遊於廬泉
泗州肝胎水旱繼災蝗蝻作祟其無居無食無
門貸愬之苦百倍於常年臣兩過其地濺淚
襟按臣僦寓山顛者越二月與督漕撫臣李
問同心安集亟賑亟集亟教車洩水不翅加
內溝矣無奈杯水難救車薪之火何也據勘
泗州被災十分肝減一分緣屬非常

恩宜破格計非額

天請命蠲帶徵而折漕米必不能存此子遺以爲

陵園護者也且有

累朝服例蠲例折運之例可查

恩波浩蕩雖今昔異時不可爲例然則今日者除議
蠲議折外或將從來水占虛糧數百畝與代養
高淳溧水馬匹銀三千三百九十三兩行令撫
按從長勘酌設法豁補若夫

三都

興都各

陵寢皆有護衛泗州獨無嘉靖四年因鹽徒之變

以州衛指揮領京操軍暫調防守至三十六年
江南倭警增設守備益以運軍隔河而趨分
操護迄今百餘載官軍受南運遶洋運苦累
亡强半一段凋耗窘敝之狀難以盡言除暫議
蠲逋減運與泗盱災民一視外仍應查比
四都護衛事例熟計永圖使

皇明基運山前腹心灰牙可恃無恐斯慰我

皇上億萬斯年受

天率

祖之極思耳伏乞

勅下戶部速議覆

請破格蠲恤并將泗州水地虛糧飛派馬價與

陵園守衛蘇困長策咨會兵部轉行撫按破議奏

請庶重地軍民豫附萬年有道彌長矣等因崇禎四

年十月二十五日奉

聖旨該部知道欽此欽遵抄出到部送司奉此遵於

十月二十九日呈堂移咨兵部與撫按查議外

案查崇禎四年十月十八日先奉本部送戶科

抄出巡按直隸監察御史史堃題爲再報災
水災謹據勘實上

聞懇祈

聖鑒大沛蠲恤以救民生一疏十月十三日奉

聖旨戶部酌議具奏欽此遵該本部於十一月二日

一日將泗州盱眙被災分數及議減召買違米

新增加派酌停天啓六七兩年未完加派併議

極災次災山陽海州等處寬恤緣繇題奉

聖旨這被災州縣酌量蠲減停徵俱依議以示寬恤

仍着該撫按榜諭民知欽此欽遵抄出到部送國
堂經呈堂咨行撫按先行榜諭通知外至十一
月二十五日隨奉送准兵部咨稱飛派馬價一
事已經車駕司案呈查覆看得

陵園官軍據稱起自嘉靖三十六年該撫按自有底
案部中無可查考要亦年來運軍苦累借衛

陵爲詞以興減運耳在計部與撫按酌審不便越俎
等因咨覆到部奉批卽移咨查議具覆奉此遵
於十一月二十八日具文併咨撫按查議屢次

舊未報其

守衛一事於崇禎五年六月二十七日該總督
部院李待問具題泗幫疲敝難支疏內將泗州
衛額運幫船江南者照舊起運遶洋總下一幫
每年密雲邊糧自運其叁萬四百二十石七
於山東遶洋

中都三總內帶運內帶運之糧原有交津京通者
盡赴天津交納卽作每年額截之數以蘇疲衝
以全漕務等因本部照議題覆已奉

命旨通行訖則所應覆者止水地虛糧一事續於本年八月十六日催津總漕部院李待問回答內稱水地虛糧一款見行道府履畝查勘俟回詳至日方敢容覆等因到部送司查得總河自上年十月具題至今爲時已久尚未勘報則本部將何具覆該本司復於八月二十六日呈堂催去後今於十一月初七日方奉本部送准總漕部院李待問會同巡按直隸監察御史饒京等稱據潁州兵備右叅議申爲憲呈行據鳳陽

八
除飛派馬價一事已經咨覆兵部

外其浸泮田糧一節帖委盱眙縣知縣孫徵

會同泗州知州李希稜駕舟同四十九里糧

長胡尚信等指引被災處所逐一從公踏勘

本州原額田地六千四百七十二頃三十四畝

七分四釐八毫該糧三萬二千二百七十三石

六斗五升四合九勺共該糧銀一萬四千六百

七十四兩一錢七分九釐八毫五絲八忽八微

五纖九沙九塵內城招仁掛辛淮青等里實

水火占田地五百零八頃九十九畝四分三釐
五毫該糧二千五百五十一石四斗四升九合
結稱泗地委屬湖波窪下其旱濕頃畝已不見
天日者數十餘年所存稍高者更被淮水衝滿
四野盡爲沼矣通融計筭被災無收十分是的
等因到院看得泗州頻年以來水患異常小民
之死者逃者逃困憊極矣是以一切惟正之供
率多逋欠而水地虛糧一項其賠累更不可言

據該道府再四查核委官履畝踏勘其被水

大占者的係五百八頃九十九畝四分三釐
毫計糧二千五百五十一石四斗四升九合照
例折色該銀一千二百七十五兩七錢二分四
釐五毫因已久沉總屬虛糧連年敲比分毫無
出據議於該州永折漕糧項下照數除豁所以
廣

皇上而蘇子遺端有望於書六部之體恤也移覆到部
奉批四川司查議歸結奉此查得總河部院原
題泗民被溺祈請蠲恤併虛糧馬價守衛等項

內除災傷請恤

陵園守衛二事已經本部先爲題覆飛派馬價一事據咨已經兵部議覆外止有水地虛糧一事據咨撫按會勘酌議迄今方據咨報前來相應查照題覆彙呈到部該臣等看得

國賦取辦於民民財出給於地若田地之蕪沒則輸納其何資泗州爲

湯沐之邑

平重地頻年受災小民死徙困累至極一切正

尚多通欠而欲以水占不毛之地今小民
空包賠此必不得之數也是以總河按臣會
備陳其苦奉

旨下部臣等屢咨撫按會勘明確以憑酌覆今據撫
按咨稱屢行道府再四查核委官逐畝踏勘共
計被水久占地五百八頃九十九畝四分三釐
五毫該糧二千五百五十一石四斗四升九合
照例折色該銀一千二百七十五兩七錢二分
四釐五毫連年敵比分毫無出議於該州永新

漕糧項下照數除豁夫亦念此

聖祖發祥之地貞元交會之區有不可與泛常州邑同類而共視者斯誠曲體民瘼憫卹災痍萬不得已之計似當照數豁免以甦窮黎者也既經撫按二臣會查前來相應覆

請恭候

命下容臣移咨鳳陽巡撫併咨都察院轉行巡按御史一體遵奉施行

正德五年十一月二十一日具

十月二十五日奉

旨依議欽此

覆四川七年元年拖欠本地錢糧疏

題爲遵

旨回奏直述可措之餉以銷積案事四川清吏司案
呈崇禎五年九月二十三日奉本部送戶科抄
出本部題覆四川巡撫張論回

奏該省拖欠七元兩年賦額緣繇奉

旨下部該臣等看得錢糧徵解出入止此數也其已
蠲年分

已單數若應徵年分地方各有歲額卽如四

省七元二年錢糧三十五萬之數在國
當日俱題者原欲括爲大勦之用豈徒托之空言
若張撫今日上

請者直欲槩入蠲免之條似盡屬之民欠矣七年
得借口

恩詔蠲也若元年則未有蠲矣今查另項收貯者
得銀四萬一千五百八十餘兩除秦兵行糧用
過二千三百二十餘兩准其開銷外其餘見在
三萬九千二百五十兩除所既稱另貯在庫追

早行解部卽以此補三年未解之秦額其不
者再行找解則其所寬假者固已多矣七年既
免元年應追及查該省元年額徵之數據稱共
欠一十六萬四千七百四十餘兩卽云兵荒之
後不能全完然旣未蠲免豈容全適合無再完
三分之一以五萬五千兩追徵解京收貯老庫
用備緩急其餘姑從緩徵以示寬政此則上下
兩便之法也抑臣等更有說焉三巴之區夙號
八府之國據稱崇禎元年以通省起存計等總

二百四十六萬八千八百八十一兩
分零臣查該省每歲解京新舊兩餉共止四萬
二萬餘兩起解之數僅及存留四分之一其餘
盡爲該省用也倘司道刻厲督責有司加意
公年結一年之數歲完一歲之糧毋以悠游
成逋負又何至如今日五年始算七年之帳
今後當於年終責令該省撫按照各省直見
事例將本年各項錢糧有司徵解原額若干
完若干夫完若干分別查叅一次俾全完者

而逋欠者懲廢經管見在各官自肩其任不致
有日後悞相推諉而頻煩

功令之履行駁查也等因具題崇禎五年九月二
十二日奉

聖旨蜀省七元兩年逋賦三十五萬前田仰題充勦
餉定係實數如何今日盡誘民欠且元年未經蠲
免自應全徵解部何得量完三分之一反滋焚索
隱着卽嚴檄該撫按勒限督催如再玩違詳查
職名叅來重違見貯誤司除准開銷外速行

三年未解秦餉應否以此項抵補還着該部
入來其歲終查叅事宜依擬嚴飭行欽此欽遵
出到部送司奉此除呈堂行咨四川撫按將
年逋欠錢糧照數追徵勒限本年十二月內解
部外其秦餉應否以此項抵補還着明白奏來
之

旨已該本司移付邊餉司會查去後續准該司付
查得蜀省錢糧原係額設解京後因就近題
充解秦餉嗣緣積逋改解太倉節奉

欽依在案其每年實額原以丁萬四百三十五兩
錢爲數在三年分者題免一半補解一半其追
徵貯庫七元二年分銀兩原非此項似難抵補
等因到司准此呈乞具覆案呈到部該臣等看
得錢糧各有款項徵解是宜攸分若移彼以補
此未免混淆原額蜀省逋欠七元兩年錢糧三
十五萬原是本地兵餉其已徵在庫三萬九千
二百餘兩者總是七元兩年之賦額也然秦自
甲興以來所留起解新舊二餉不貲豈無贏餘

應照數解京銷算不得補作三年來餉銀
近查已解到矣但七年委奉

恩詔蠲免其拖欠者似難窮追至崇禎元年分尚欠
一十六萬四千七百四十餘兩雖不當聽其拖欠
但係本地兵餉原非解京之數似應仍照前
議姑以五萬五千兩解部收貯老庫用備緩急
其餘二併照數徵完留貯該省備用者也既經
該司案呈前來相應覆

請恭候

命下臣部行文四川巡撫并都察院轉行四川巡按御史一體欽奉施行

崇禎五年十二月初十日具

題本月十三日奉

聖旨是該省元年分所欠賦額據稱原非解京之數前疏何不說明其天啓七年分免徵還着該撫按大書榜示毋使婪猾仍滋苛擾本內七年誤元年正行欽此

再覆江北州縣水災賑卹蠲折疏

題爲江北連年被災民情孔亟遵

旨勘明被災實情懇乞

皇上大沛恩澤以安重地事四川清吏司察呈崇禎
五年十一月二十六日奉本部送戶科抄出巡
按直隸監察御史饒京題前事內稱奉都察院
勘劄准戶部咨奉有勘明具奏之

據淮海等道副使周汝璣等詳報勘過被災實
處城興化爲十分海州九分八厘寶應九分

唐邳州九分宿遷八分八厘睢寧八分七厘
高郵徐州七分沛縣六分山陽五分六厘淮安
衛五分三厘豐縣大河衛各五分桃源不足五
分沐陽四分九厘贛榆四分八厘清河安東盛
州蕭縣碭山各四分邳徐左三衛受災亦同至
鳳陽府報過水災有宿州亳州潁州潁上太和
靈璧虹縣霍丘鳳陽天長臨淮泗州盱眙十三
州縣勘詳未至容文到日另行具題第內有泗
州盱眙縣臣居泗三月往來水面親勘已久泗

州受災七分盱眙縣被災五分此切近

祖陵猶當首惠今日之盼盼懸望者惟君

皇上大施賑恤或賑或蠲或折或緩舊逋卽如盐城
一縣卽全蠲猶思望賑興化寶應被水尤酷雖
分數不一而前災後災踵繼情急勢迫臣見漕
運中除正米一石正耗一斗零外另有私耗每
石約四五斗准令改折亦可爲災殘者開便門
也謹會同總督漕撫戶部尙書李待問冒死上

詔覆等因十一月二十四日奉

聖旨該部看議具覆欽此同日又該戶科抄出巡按御史饒京題爲災民景象難支地方補救宜預仰懇

聖明急爲籌畫使重地久安長治事內稱十月抄出巡淮揚饑民遮道告賑查其名數得二萬八千五百餘名卽發積穀二千石碾米另按贖銀換錢六十萬唱名分給不過暫解一時之厄然此

數萬之衆爲數月之計莫如煮粥二策敢再
撫臣李待問前

請留漕米二三萬石分被災州縣各設粥廠供本地
饑民此爲一時然倉之計又思爲一年之計莫
如軫惜一節臣聞蠶城已不能開徵一文興化
亦未嘗輸米一粒重災之民救死不贍朝夕惶
懼莫若寬以撫之恩以桑之災重者議蠲稍重
者議折民或可從容自安生計爲年年之計莫
築新河決口今年水泛復將蘇甯建議等處

兩大口河水奔逸而下遂使相近城邑無
水中民所以無家無食而思盜也况茲

陵寢重地非他省一隅可比伏望

勅部議蠲議恤議築則地方幸甚等因十一月二十
四日奉

聖旨該部看議具奏欽此同日又該戶科抄出直隸
淮安府睢寧縣災民高薦等奏爲痺邑疊罹水
災小民逃亡幾盡謹列苦情亟懇

皇恩早賜蠲恤以存子遺事內稱淮屬州縣起派原

無兩例今查山陽等五州縣遼餉銀每項止派
三二錢乃睢寧派及六錢以上其苦于溢額一
也睢寧土俗播種惟有麥豆禱糧並無粟米每
年遠出百里外收買還赴水次賠累至極不得
比照安東改折事例其苦于買糧二也睢寧原
派有協濟邳州鍾吾桃源淮陰百善等驛銀兩
迄今殘縣昏墊尚望救于鄰國安能舍已耘人
其苦于協濟三也水患方殷新徵舊欠併催逃
之民終無起色崇禎五年以前舊欠暫停俟

年照例帶徵不亦少緩須臾之死乎今新舊
併催其苦于羨納四也至于河工夫料自有河
官買募今年年派買花戶領一賠十節年累窮
累近幾千人矣其苦于夫役五也睢寧額設三
十四里大里四五百丁小里三二百丁邇年逃
者八九卽今一里存者不過三五十人少者一
二十人甚至一里全無一人况今縣丞旣裁似
應歸併爲十七里着見在者當差以逃亡之遺
差查將異戶寄買本縣田地羨地審編庶額總

不缺縣治可復今苦于虛額六也凡此六者皆
唯民然肩之急剜肉之苦伏乞

勅下戶部酌議施行等情十一月二十四日奉

聖旨戶部知道本內河工夫料節年派買是何緣故
併着工部查明欽此十二月初七日又該戶科抄
出山東道監察御史吳姓題爲河決一日不塞
災邑殘廢可憫懇乞

賜拯救以安兩淮以存子遺事內稱興化地
下全賴西北長堤保障自崇禎四年水漲

新河蘇家嘴建義口決矣至今年又被水
潰乃高寶一帶漕堤門閘城壩等處又在在告
潰西北之水盡滙興化數百里內村舍田廬漂
蕩一空斗大孤城深浸水中老弱少壯生者既
不得有其身家至百年丘墓爲馮夷所啗各掘
塲草田泮沒樵蘇無路小民析骨而爨死者亦
不得有其朽骨牛畜舟舡盡遭覆溺農者不得
執耕于野高泰塩城大盜嘯聚千百客舟米貨
盡遭劫掠商者不得揀出于途以致流亡殆盡

計臣亦知興塩爲異常災傷而興化漕糧止議
半折又每石折銀八錢夫興化受水劇于塩城
顆粒不收卽令全折亦難望其完納

神祖時曾截漕糧數十萬石賑山東饑民今獨奈何各
此數千石米不以恤災黎哉又攷

祖宗朝凡遇災傷必

下詔蠲租改折每石以五錢爲則若槩律以欠折新
例民何以堪且京邊等項力難措納

民將自蠲何如恩出

可以威動人心也近見按臣饒京兩疏
淚其請蠲請賑願戶部諸司遵

旨看議題覆等因十二月初三日奉

聖旨朝廷特設總河重臣及各司分理且錢糧額派
不貲如何河決堤潰全無修築以致貽禍地方覽
奏殊可痛恨卽着朱光祚會同李待問速行查勘
決口若干估計工料幾何確議馳奏一面責成道
府印河各官刻期興役務期堅整蚤竣不得玩愒
取罪年來分司河官着查明奏奪其蠲卹事宜據

與議覆該部知道欽此十二月初十日又該戶科
抄出直隸揚州府高郵州寶應縣災民楊元達
等奏爲水患頻仍饑民日散懇乞

聖恩憐憫極災亟議蠲賑以解萬姓倒懸事內稱寶
應去歲六月霍雨益傾並受新溝等堤崩決之
患湧爲巨浸田廬漂沒百里無煙真古今未有
之異災不意今年六月颶風大作黃河漲溢仍
上蘇家壩地方復潰而南注數百餘里將熟田
悉沉水底而不逞之徒嘯聚爲盜屠村截

流涕向

災切體哭聲震天無家產所析無尺土
加以漕米徵兌屆期日加惶怖不得不痛
皇上陳之伏望准將本年漕折及一切拖欠錢糧
賜蠲停仍發

帑金大加賑濟俾祝

皇恩千萬世等情十二月初八日奉

聖旨該部知道欽此欽遵通抄到部送司奉此除
檄新河係總河總漕所轄與河工派買夫料

俱奉

旨卽着漕河二臣速行勘奏併工部另行查明外其
請留漕米併折私耗及令比安東改折係雲南司均
遼餉係新餉司職掌當經移付二司會議去後
今於初十日隨各准酌議移覆到司查覆間十
二月十五日又奉本部送戶科抄出巡按直隸
監察御史饒京題爲續報勘明鳳屬災傷謹補
具上

稱十一月二十二日始據潁州道申爲
詳勘得鳳陽縣實災七分太和縣亳州五河
縣各實災六分潁上縣實災五分五厘潁州天
長臨淮懷遠蒙城各實災五分宿州靈璧各實
災四分五厘虹縣霍丘壽州各實災四分仰祈
勅部併臣前疏查照分數議處或
俞允改折或暫爾寬徵總出

浩蕩之恩等因十二月十三日奉

聖旨該部知道欽此欽遵抄出到部送司案查本年

八月十九日該戶科抄出巡按直隸監察御史
饒京題爲黃河漫漲江北再受水災盜賊蠭起
微臣目擊心憂謹據實奏

聞仰祈

恩卹亟救殘黎以靖地方事等因八月十八日奉

聖旨據奏地方災盜情形亟宜修拯銷弭饒京着會
同該撫嚴飭道府有司撫字流離剿戢嘯聚卹荒
亂以安重地如各官有玩縱溺職的叅來處泊
卹將被災實情勘明具奏該部知道欽此欽

以出到部送司奉此隨經呈堂咨行該撫按
遵照嚴飭所屬撫剿卹剪以安重地併將被災
實情勘奏去後十一月初十日又該戶科抄出
直隸揚州府高郵州興化縣知縣今戴罪督催
趙龍奏爲登至之水災異常再溺之殘民難保
冒罪急告乞

恩蠲賑以救子遺以存縣治事內稱興化地形金底
有注無流故隣邑未淹而興化已先沒崇禎四
年六月淮黃交漲百姓巢傾食絕盜賊竊發人

民一空撫按彙題蒙

恩量減新增遼餉每畝一厘臣具申院道發倉煮粥
勸助延至今春不意七月十五以後水又陡發
城內城外一望成湖四境絕烟百姓逃亡更慘
于去年去年漕糧遼糧一萬八千餘石永折漕
銀一萬兩無可借辦該臣先勸義民黎典等貸
銀出境買米完漕永折銀兩又百計那借終事
今借者未完人人逃竄是舊歲水災僅無錢糧
厥水災更無百姓伏乞

旨覆加查勘大

至四五兩年錢糧無論舊逋新租存留起運
一槩從何措辦不得不激切祈

恩盡行蠲免等因十一月初五日奉

聖旨已有旨了戶部知道欽此欽遵抄部送司奉此
案候間今該巡按饒御史遵

旨勘災具題前來相應通行題覆案呈到部該臣等
看得江北撫按會勘災傷及臺臣縣官災民傷
陳水患諸䟽娓娓數千言其指河決荏苒之害

述流亡鬻產之狀而力爲蠲折停賑之

請誠不啻繪鄭俠之圖而抱曹誼之痛臣民部也民
有疾苦而不爲調劑臣謂之所不敢也况蒙

聖心惻念災盜着撫按督屬修拯銷弭河決責總河
分司諸臣查估興役蠲卹事宜令臣部議覆則
聖明視民如傷之念真超軼千古矣臣等敢弗仰體
宸慈破格上

人惠此顛沛之遺黎乎今據撫按會勘災重者爲
九分八分稍次者爲七分六分五分卽就

災民之疏次第酌陳如煮粥一策先該部
陽撫按題留漕米二三萬石分廠煮濟該臣部
議覆恐京儲太損難以槩徇准將按臣史堉積
存見貯穀一萬六千七百五十石聽其支用
准動淮揚二府屬州縣舊餉額內積穀二分
餉銀數暫留一年以應其需題覆在案今饒
二御史慮恐數萬餓民前議不足爲招撫
之術復申前

請第漕米係京軍急需業經具在議折似難復議

留合無再議將廬鳳二府無災州縣見積穀數
併二分克餉銀兩量動一年卽着撫按道府將
今勘過塩城興化及泗州盱眙等二十二州縣
淮大邳徐等衛及續勘宿州等十五州縣受災
軍民酌災傷之輕重分賑資之多寡各委廉能
推官親臨點散穀濟饑民銀乞牛種以昭

朝廷賑恤之仁完日備將用過銀穀數目賑過災民
戶數造冊報部開銷其改折漕糧一項先該臣
覆塩城該漕糧正耗三萬三千餘石盡改

每石八錢興化該正糧一萬二千八百七
五石九斗睢寧該正糧一千一百石邳州該
正糧二千一百五十六石三斗五升各准改折
一半每石八錢俱限明年秋成完納已經題奉
欽依在卷今該巡按饒御史復爲開列州縣被災分
數連章上

請又吳御史具疏爲災民

請命睢寧寶應災民高薦等具奏哀鳴閱其數陳情
狀殊可痛心且奉

明旨蠲恤事宜并與議覆今已無再申前

請除鹽城漕糧全折外其西六化睢寧邳州亦俱各准全折又續報海州寶應宿遷據按臣疏報分數與邳州等州縣雖稍有差等而受災則一海州該正糧一萬二千九百五十石寶應縣該正糧五千六百六十七石七斗宿遷縣該正糧四千七百石亦應照例全折各五年分一年以上耗自經資席易等項俱照鹽城之例具數報部查郵徐州鳳陽俱被災七分應准改折正項

朱以示寬恤泗州雖係七分查係永折似
再議其他沛縣山陽等二十六州縣受災較
淺不敢槩徇所折之價前議每石八錢實念

國課爲重恐多濫觴今饑溺之衆實若剝膚縱不
得援永折五錢之例亦當查照前議量減二錢
每石以六錢爲率似覺適得其平耳至運軍私
耗一款乃運軍盤剝費用之需盡于此中取給
一旦遽爲改折恐銀旣入手未免浸沒花費將
來掛欠必多則與其折私耗寧折正耗之爲得

也合將高郵徐州鳳陽等州縣正項三耗米俱
准改折每石照前折銀六錢泗州係永折無耗
可折至於加派係薊遼計口額需近因所在蠲
留補苴無術揆時度勢實有不敢輕議再蠲者
今不得已議將災傷獨甚地方如淮安之塩城
縣新舊加派額銀一萬三千八百二兩一錢三
分零揚州之興化縣新舊加派額銀八千八百
八十六兩八錢一分零寶應縣該新舊額銀五
千五百五十兩五錢九分零俱與全蠲六年分

泗州除新派三厘先經永免外止該舊派
金七千二百六十兩一錢零俱與全蠲六年分
一年其次如邳州新加三厘已經永免一厘五
毫止量加一厘五毫銀一千九百八十四兩二
錢九分零宿遷縣新加三厘已經永免一厘止
量加二厘銀九百六十五兩一錢九分零睢寧
縣新加三厘已經永免二厘止量加一厘銀八
百五十四兩零各蠲六年分新派銀一年如鹽
城興化海州寶應邳州宿遷睢寧七州縣本年

應解太倉錢糧除已徵在官外未完銀兩姑議
緩徵并漕折俱俟明年麥熟行催高郵徐州鳳
陽泗州沛縣太和亳州五河山陽潁上豐縣盱
眙潁州天長臨淮懷遠蒙城沐陽宿州靈璧蕭
榆桃源清河安東泰州蕭縣碭山虹縣霍丘壽
州等處淮安大河邳徐左等衛難以驟徵寬政
或將本年存留錢糧緩徵舊逋緩解稍示優卹
至於所請比秦餼益起請

此

可否出自

郭天升臣部所取擅議也其睢寧災民高薦等所奏
遼餉派及六錢之上及豁邳州等驛協濟併縣
泊三十四里虛額議爲十七里俱事在彼中應
聽撫按酌議可否咨覆再議者也既經撫按及
臺臣具題前來相應覆

請恭候

命下臣部移咨鳳陽巡撫及都察院轉行淮楊巡按
御史一體遵奉施行

崇禎五年十二月二十三日具

題本月二十五日奉

聖旨俱依議還着該撫按嚴飭有司加意拯恤賑穀
務使民沾實惠仍具數報部以憑查核其改折量
減二錢及蠲免六年分加派併緩徵等項着大書
榜示不許婪猾隱濶苛擾欽此